



宋書
八



リ 8
1735
94



1735
94

宋書卷二十九

志第十九

符瑞下

嘉禾五穀之長王者德盛則二苗共秀於周德三苗共穗於商德
同本異穗於夏德異本同秀

漢宣帝元康四年嘉穀玄稷降于郡國

漢章帝元和中嘉禾生郡國

漢安帝延光二年六月嘉禾生九真百十六本七百六十八穗

漢桓帝建和二年四月嘉禾生大司農帑

漢桓帝永康元年八月嘉禾生魏郡

魏文帝黃初元年郡國三言嘉禾生

吳孫權黃龍三年十月會稽南平始言嘉禾生

新嘉志

此係明治八年八月八日
所購山田同資一
購以贖資一

新嘉志

新嘉志



孫權赤烏七年秋宛陵言嘉禾生

晉武帝泰始八年十月瀘水胡王彭護獻嘉禾

晉武帝泰康四年十二月嘉禾生扶風雍

太康五年七月嘉禾生豫章南昌

太康八年閏三月嘉禾生東夷校尉園

太康八年九月嘉禾生東萊掖

晉愍帝建興元年八月癸亥嘉禾生襄平縣一莖七穗

建興二年六月嘉禾生平州治三寶同蒂

建興三年七月嘉禾生襄平縣異體同蒂

宋文帝元嘉二年十月嘉禾生潁川陽翟太守垣苗以聞

元嘉九年三月嘉禾生義陽豫州刺史長沙王義欣以獻

元嘉十年八月嘉禾生汝南苞信豫州刺史長沙王義欣以獻

元嘉十一年八月嘉禾一莖九穗生北汝陰太守王玄謨以獻

元嘉二十年六月嘉禾一莖九穗生上庸新安梁州刺史劉道以

獻

元嘉二十一年嘉禾生新野鄧縣雍州刺史蕭思話以獻

元嘉二十二年六月嘉禾生藉田一莖九穗

元嘉二十二年七月癸酉嘉禾生平虜陵徐州刺史臧質以獻

元嘉二十二年九月嘉禾生太尉府田太尉江夏王義恭以聞

元嘉二十二年九月嘉禾生揚州東耕田刺史始興王濬以聞

元嘉二十二年嘉禾生華林園百六十穗園丞陳襲祖以聞

元嘉二十二年嘉禾生潁川陽白豫州刺史趙伯符以獻

元嘉二十三年七月乙丑嘉禾生藉田令褚熙伯以聞

元嘉二十三年七月庚午嘉禾生丹陽椒唐里揚州刺史始興王

濬以聞

元嘉二十三年七月庚辰嘉禾生醴湖屯屯主王世宗以聞

元嘉二十三年八月己酉嘉禾生華林園園丞陳襲祖以聞

元嘉二十三年九月庚申嘉禾生沛郡蕭征北大將軍衡陽王義

季以聞

元嘉二十三年嘉禾生江夏汝南荊州刺史南譙王義宣以聞

元嘉二十四年七月乙卯嘉禾旅生華林園及景陽山園丞梅道

念以聞太尉江夏王義恭上表曰臣聞居高聽卑上帝之功天且

弗違聖王之德故能影響二儀甄陶萬有鑒觀今古采驗圖緯未

有道闕化虧而禎物著明者也自皇運受終辰曜交和是以卉木

表靈山淵效寶伏惟陛下體乾統極休符襲逮若乃鳳儀西郊龍

見東邑海首獻改緇之羽河祇開俟清之源三代象德不能過也

有幽必聞無遠弗屆重譯歲至休瑞月臻前者躬藉南畝嘉穀乃
植神明之應在斯尤盛四海既穆五民樂業思述汾陽經始靈囿
蘭林甫樹嘉露頻流板築初就祥穉如積太平之符於是乎在臣
以寡立承乏槐鉉沐浴芳津預覩冥慶不勝抃舞之情謹上嘉禾
甘露頌一篇不足稱揚美烈追用悚汗其頌曰二象攸分三靈樂
主齊應合從在今猶古天道誰親唯仁斯輔皇功帝績理冠區宇
四民均極我后體茲惟機惟神敬昭文思九族既睦萬邦允釐德
以位叙道致雍熙於穆不已顯允東儲生知夙獻嶽茂淵虛因心
則哲令聞弘敷繼徽下武儷景辰居軒制合宮漢興未央矧伊聖
朝九有已康率由舊典思燭前王乃造陵霄遂作景陽有藹景陽
天淵之浹清暑爽立雲堂特起植類斯育動類斯止極望江波遍
對岳峙化德惟達休瑞惟懋誕降嘉種呈祥初構甘露春凝禎穉

秋秀于今匪烈嗣歲仍富昔在放勳曆莢數朝降及重華倚扇清
庖鑠矣皇慶比物競昭倫彼典策被此風謠資臣六蔽任兼兩司
既恧仲袞又慙鄭緇豈忘衡泌樂道明時敢述休祉愧闕令辭
中領軍吉陽縣侯沈演之奏上嘉禾頌曰煥炳禎圖昭晰瑞典運
傾方閱時亨始顯綈狀既章鳥文斯辯於皇聖辟承物紀遠明兩
辰麗昌輝天衍其理妙位崇事神業盛淵渥德澤虛寂道政協化
安心調樂移性玉衡從體瑤光得正臣星垂采景雲立慶其極仁
所被罔幽不攘至和所感靡況弗彰駕出丹穴鸚起西廂白鹿踰
海素鳥越江結饗穹陰儀形鐘陽其治人奉天迺勤迺格黛未俶
載高廩已積嘉禾重穆甘露流液擢秀辰畦揚穎角澤離穰合豪
榮區蔭斥其盈箱徵殷貫桑表周今我大宋靈貺綢繆帝終撫謙
繹思勿休躬薦宗廟温恭率由降福以誠孝享虔羞其頌趾推功

登徽獻詔恩覃隱顯賞延荒微河濂海夷山華岳耀憬琛夔賚兼
澤委效日表地外改服請教其茂對盛時綏萬屢豐厭厭歸素秩
秩大同上藏諸用下知所從仰式王度俯歌南風鴻名稱首永保
無窮其

元嘉二十四年八月乙巳嘉禾生魚城內晉陵南徐州刺史廣陵
王誕以聞

元嘉二十五年六月壬寅嘉禾旅生華林園十株七百穗園丞梅
道念以聞

元嘉二十五年六月壬子嘉禾生藉田藉田令褚熙伯以獻

元嘉二十五年七月壬辰嘉禾生北海青冀二州刺史杜坦以獻

元嘉二十五年八月丙午嘉禾生太尉江夏王義恭果園江夏國
典書令陳頴以聞

元嘉二十五年八月壬子嘉禾生建康化義里令丘珍孫以獻

元嘉二十五年八月癸丑嘉禾生華林園園丞梅道念以獻

元嘉二十五年十一月嘉禾生巴東荊州刺史南譙王義宣以聞

元嘉二十六年五月癸酉嘉禾生建康禁中里揚州刺史始興王

濬以獻

元嘉二十六年六月甲寅嘉禾生藉田藉田令褚熙伯以獻

元嘉二十六年七月嘉禾生巴東胸臆荊州刺史南譙王義宣以

獻

元嘉二十七年十月己丑嘉禾生北海青州刺史杜坦以聞

元嘉二十八年七月戊戌嘉禾生廣陵邵伯埭兗州刺史江夏王

義恭以聞

孝武帝孝建二年六月癸巳嘉禾二株生江夏王義恭東田

孝建二年九月己丑朔嘉禾異畝同穎生齊郡廣饒縣

孝建三年七月庚午嘉禾生吳興武康

孝武帝大明元年五月戊午嘉禾一株五莖生清暑殿鴟尾中

大明元年八月甲申嘉禾生青州異根同穗

大明三年九月乙亥嘉禾生北海都昌縣青州刺史顏師伯以聞

大明六年八月辛未嘉禾生樂陵青冀二州刺史劉道隆以聞

明帝泰始元年七月己酉嘉禾生會稽永興太守巴陵王休若以

獻

漢章帝元和中嘉麥生郡國

晉武帝太康十年六月嘉麥生扶風郡一莖四穗是歲收三倍

宋明帝元嘉二十三年醴湖屯生嘉粟一莖九穗屯主王世宗以

聞

元嘉二十五年六月壬子嘉禾生藉田藉田令褚熙伯以獻

吳孫權黃龍三年由拳野稻生改由拳為禾興

吳孫亮五鳳元年交趾稗草化為稻

宋文帝元嘉二十三年吳郡嘉興鹽官縣野稻自生三十許種揚

州刺史始興王濬以聞

元嘉二十八年七月癸卯尋陽柴桑菽粟旅生彌漫原野江州刺

史建平王宏以聞

漢章帝元和中嘉瓜生郡國

漢安帝元初三年二月東平陵有瓜異處共生八瓜同蒂

漢桓帝建和二年七月河東有嘉瓜兩體同蒂

晉武帝太康三年六月嘉瓜異體同蒂生河南洛陽輔國大將軍

王濬園

晉武帝太康元年十二月戊子嘉瓠生寧州寧州刺史費統以聞

宋文帝元嘉二十五年四月戊辰嘉瓠生京邑新園園丞徐道興

以獻

孝武帝大明五年五月嘉瓜生建康蔣陵里丹陽尹王僧朗以獻

明帝太始二年八月戊午嘉瓜生南豫州南豫州刺史山陽王休

祐以獻

文帝元嘉七年七月乙酉建康額檐湖二蓮一蒂

元嘉十六年七月壬申華林池雙蓮同幹

元嘉十年七月己丑華林天淵池芙蓉異花同蒂

元嘉十九年八月壬子揚州後池二蓮合華刺史始興王濬以獻

元嘉二十年五月廬陵郡池芙蓉二花一帶太守王淵以聞

元嘉二十年六月壬寅華林天淵池芙蓉二花一帶園丞陳襲祖

以聞

元嘉二十年夏永嘉郡後池芙蓉二花一蒂太守臧藝以聞

元嘉二十年七月吳興郡後池芙蓉二花一蒂太守孔山士以聞

元嘉二十年揚州後池芙蓉二花一蒂刺史始興王濬以獻

元嘉二十一年六月丙午華林園天淵池二蓮同幹園丞陳襲祖

以聞

元嘉二十年四月樂遊苑池二蓮同幹苑丞梅道念以聞

元嘉二十二年七月東宮玄圃園池二蓮同幹內監殿守舍人宮

勇民以聞

元嘉二十三年六月壬寅華林天淵池芙蓉二花一蒂園丞陳襲祖以聞

元嘉二十三年六月辛丑太子西池二蓮共幹池統胡永祖以聞

元嘉二十三年八月己酉魚邑三周池二蓮同幹園丞徐道興以聞

孝武帝孝建二年六月庚寅玄武湖二蓮同幹

孝武帝大明五年藉田芙蓉二花同蒂大司農蕭邃以獻

明帝太始二年八月丙辰五城澳池二蓮同幹都水使者羅僧愍以獻

太始二年八月己未豫州刺史山陽王休祐獻蓮二花一蒂

太始五年六月甲子嘉蓮生湖孰南臺侍御史竺曾度以聞

太始六年六月壬子嘉蓮生東宮玄圃池皇太子以聞

晉武帝太始二年六月壬申嘉柰一蒂十實生酒泉

太始七年六月己亥東宮玄圃池芙蓉二花一蒂皇太子以獻

晉成帝咸和六年鎮西將軍庾亮獻嘉橘一蒂十二實

晉安帝隆安三年武陵臨沅獻安石榴一蒂六實

雲有五色太平之應也曰慶雲若雲非雲若烟非烟五色紛縕謂

之慶雲

漢宣帝神爵元年春齋戒之莫神光顯著薦鬯之夕神光交錯或降於天或登於地或從四方來集於壇

漢章帝元和三年正月車駕北巡以太牢祠北岳山見黃白氣宋孝武帝大明元年五月壬子紫氣從景陽樓上層出狀如烟回薄良久

明帝太始二年三月丙午黃紫雲從景陽樓出隨風回久乃消華林園令臧延之以聞

太始二年六月己卯日入後有黃白赤白氣東西竟天光明潤澤久乃消

太始四年十一月辛未崇寧陵令上書言自大明八年至今四年二月宣太后陵明堂前後數有光及五色雲又芳香四滿又五采

雲在松樹下狀如車蓋

太始七年四月戊申夜京邑崇虛館堂前有黃氣狀如寶蓋高十許丈漸有五色道士修靜以聞

白兔王者敬耆老則見

漢光武建武十三年九月南越獻白兔

章帝元和中白兔見郡國

魏文帝黃初中郡國十九言白兔見

晉武帝太始五年七月己亥白兔見北海卽墨卽墨長獲以獻

晉武帝咸寧二年十月癸亥白兔二見河南陽翟陽翟令華衍獲以獻

咸寧四年六月白兔見天水

晉武帝太康二年八月壬子白兔見彭城

太康二年十月白兔見趙國平鄉趙王倫獲以獻

太康四年十一月癸未白兔見北地富平

太康八年十二月庚戌白兔見陳留酸棗關內侯成公忠獲以獻

晉穆帝永和十二年九月甲申白兔見鄱陽太守王耆之以獻并

上頌一篇

晉穆帝升平三年十二月庚申北中郎將郝曇獻白兔

晉海西公泰和九年四月陽穀獻白兔

晉孝武帝太元十五年三月白兔見淮南壽陽

晉安帝義熙二年四月無錫獻白兔

義熙二年四月壽陽獻白兔

宋文帝元嘉六年九月長廣昌陽淳于邈獲白兔青州刺史蕭思話以獻

元嘉八年閏六月丁亥司徒府白從伊生於淮南繁昌獲白兔以獻

元嘉十三年七月甲戌濟南朝陽王道獲白兔青州刺史段宏以獻

元嘉十四年正月丙申白兔見山陽縣山陽太守劉懷之以獻

元嘉十五年七月壬申山陽師齊獲白兔南兗州刺史江夏王義恭以獻

元嘉二十二年三月白兔見東萊當利青州刺史杜異以聞

元嘉二十四年七月丁巳白兔見兗州刺史徐瓊以聞

元嘉二十四年七月乙酉白兔見東莞太守趙球以獻

元嘉二十七年二月壬辰白兔見竟陵荊州刺史南譙王義宣以獻

元嘉二十七年六月丙午白兔見南汝陰豫州刺史南平王鑠以獻

孝武帝孝建二年正月庚戌白兔見淮南太守申坦以聞

孝建三年閏二月乙丑白兔見平原獲以獻

孝武大明元年六月庚子白兔見卽墨獲以獻

大明六年八月辛未白兔見北海青冀二州刺史劉道隆以獻

大明六年六月乙丑白兔見青冀二州刺史劉道隆以獻

斗殞精王者孝行溢則見

關

赤烏周武王時銜穀至兵不血刃而殷服

漢章帝元和中赤烏見郡國

吳孫權赤烏元年有赤烏集於殿前

吳孫休永安三年三月西陵言赤烏見

晉元帝永昌一年正月赤烏見暨陽

宋武帝永初二年二月赤烏見北海都昌

孝武帝大明五年六月戊子赤烏見蜀郡益州刺史劉思考以獻

白燕者師曠時銜丹書來至

漢章帝元和中白燕見郡國

晉惠帝元康元年七月白燕二見酒泉祥福太守索靖以聞

宋文帝元嘉元年七月壬戌白燕集齊郡城游翔庭宇經九日乃

去衆燕隨從無數

元嘉十四年白燕集荊州府門刺史臨川王義慶以聞

元嘉十八年六月白燕產丹徒縣南徐州刺史南譙王義宣以聞

元嘉二十年五月白燕集南平鄉府內內史臧綽以聞

元嘉二十一年白燕見廣陵南兗州刺史廣陵王誕以獻

元嘉二十四年五月辛未白燕集司徒府西園太尉江夏王義恭以聞

元嘉二十五年八月壬子白燕見廣陵城南兗州刺史徐湛之以聞

元嘉二十六年五月戊寅白燕產衡陽王墓亭郎中令朱曠之獲以聞

元嘉二十七年五月甲戌白燕產京口南徐州刺史始興王濬以聞

元嘉二十七年六月壬辰白燕見秣陵丹陽尹徐湛之以獻

孝武帝大明二年五月乙巳白燕產南郡江陵民家荊州刺史朱修之以獻

大明二年五月甲子白燕二產山陽郡舍南兗州刺史竟陵王誕

以獻

大明二年六月甲戌白燕產吳郡城內太守王翼之以獻

大明三年五月甲申白燕產武陵臨沅民家郢州刺史孔靈符以聞

大明四年六月乙卯白燕見平昌青州刺史劉道隆以獻

明帝太始二年六月白燕見零陵獲以獻

金車王者至孝則出

闕

三足烏王者慈孝天地則至

漢章帝元和中三足烏見郡國

象車者山之精也王者德澤流洽四境則出

闕

白鳥王者宗廟肅敬則至

漢桓帝永壽元年四月白鳥見商國

晉武帝咸寧五年七月戊辰白鳥見齊南隰太守獲以獻

晉武帝太康元年五月庚午白鳥見襄

太康十年五月丁丑白鳥見京兆長安

晉惠帝元康元年四月白鳥見河南成臯縣令劉機獲以聞

元康元年五月戊戌白鳥見梁國睢陽

元康元年七月辛丑白鳥見陳留獲以獻

元康四年十月白鳥見鄱陽

晉明帝泰寧二年十一月白鳥見京都

泰寧三年三月白鳥見吳郡海虞獲以獻羣官畢賀

晉孝武帝太元十一年八月乙酉白鳥集江州寺庭羣鳥翔衛

太元二十一年五月癸卯白鳥見吳國獲以獻

宋武帝永初二年六月丁酉白鳥見吳郡婁縣太守孟顛以獻

文帝元嘉二年十一月丙辰白鳥見山陽太守阮寶以聞

元嘉三年三月甲戌丹陽湖執薛爽之獲白鳥以獻

元嘉十一年六月乙巳吳郡海鹽王說獲白鳥揚州刺史彭城王

義康以獻

元嘉十三年三月戊辰義興陽羨令獲白鳥太守劉禎以獻

元嘉十九年五月海陵王文秀獲白鳥南兗州刺史臨川王義慶

以獻

元嘉十九年十月白鳥產晉陵暨陽僑民彭城劉原秀宅樹原秀

以聞

元嘉二十年七月彭城劉原秀又獲白鳥以獻

元嘉二十四年八月乙巳白鳥見晉陵南徐州刺史廣陵王誕以

獻

孝武大明元年四月甲申白鳥見南郡江陵

明帝太始二年六月丁巳白鳥見吳郡海鹽太守顧覲之以獻

太始二年九月壬寅白鳥見吳興烏程太守郗願以獻

白雀者王者爵祿均則至

漢章帝元和初白雀見郡國

魏文帝初郡國十九言白雀見

晉武帝咸寧元年白雀見梁國梁王彤獲以獻

晉武帝太康二年六月丁卯白雀二見河內南陽太守阮佃獲以

獻

太康二年六月白雀二見河南河南尹向雄獲以獻

太康七年七月庚午白雀見豫章

太康八年八月白雀見河南洛陽

太康十年五月丁亥白雀見宣光北門華林園令孫邵獲以獻

晉愍帝建武元年四月尚書僕射刁協獻白雀於晉王

晉孝武帝太康十六年十二月白雀見南海增城縣民吳比屋

晉安帝隆安五年十一月白雀見宜都

晉安帝元興三年六月丙申白雀見豫章新淦獲以獻

宋文帝元嘉元年七月己巳白雀見齊郡昌國

元嘉四年七月乙酉白雀見北海劇

元嘉八年五月辛丑白雀集左衛府

元嘉十一年五月丁丑齊郡西安宗顯獲白雀青州刺史段宏以

獻

元嘉十四年五月甲午白雀集費縣員外散騎侍郎顏敬家獲以

獻

元嘉十四年白雀二見荊州府客館

元嘉十五年五月辛未白雀集建康都亭里揚州刺史彭城王義康以聞

元嘉十五年六月白雀見建康定陰里彭城王義康以獻

元嘉十五年八月白雀見西陽江州刺史南譙王義宣以獻

元嘉十七年五月壬寅白雀二集荊州後園刺史衡陽王義季以聞

元嘉十八年七月吳郡鹽官于玄獲白雀太守劉禎以獻

元嘉二十年五月乙卯秣陵衛猗之獲白雀丹陽尹徐湛之以獻

元嘉二十二年四月丙子白雀見東安郡徐州刺史臧質以獻

元嘉二十二年閏五月丙午白雀見華林園員外散騎侍郎長沙王瑾獲以獻

元嘉二十二年六月庚申南彭城蕃縣時佛護獲白雀以獻

元嘉二十四年四月白雀產吳郡鹽官民家太守劉禎以獻

元嘉二十四年六月巳亥白雀五集長沙廟長沙王瑾以聞

元嘉二十五年五月丁丑白雀二見京都材官吏黃公歡軍人丁田夫各獲以獻

元嘉二十七年六月乙卯白雀見濟南郡薛榮以獻

元嘉二十八年八月巳巳崇義軍人獲白雀一雙太子左率王錫以獻

元嘉二十九年四月癸丑白雀見會稽山陰太守東海王禕獲以獻

孝武帝孝建元年五月巳亥臨沂縣魯尚期於城上得白雀太傅假黃鉞江夏王義恭以獻

孝建二年六月丙子左衛軍獲白雀以獻

孝建三年閏三月辛酉黃門侍郎庾徽之家獲白雀以獻

孝建三年五月丁卯白雀見建康獲以獻

孝武帝大明元年四月白雀見尋陽

大明元年五月甲寅白雀二見渤海獲以獻

大明元年五月甲子白雀見建康獲以獻

大明元年六月丁亥白雀見零陵祈陽獲以獻

大明元年七月辛亥白雀見南陽宛獲以獻

大明二年五月丁未白雀見建康揚州刺史西陽王子尚以獻

大明二年六月丁亥白雀見河東定襄縣荊州刺史朱修之以聞

大明三年四月庚戌白雀見秣陵丹陽尹劉秀之以獻

大明三年五月壬午太宰府崇甄軍人獲白雀太宰江夏王羨恭以獻

大明四年五月辛巳白雀見廣陵侍中顏師伯以獻

大明五年四月庚戌白雀見晉陵太守沈文叔以獻

大明五年五月白雀見尋陽江州刺史桂陽王休範以獻

大明五年五月癸未白雀二見尋陽江州刺史桂陽王休範以獻

大明五年五月癸未白雀二見濟南青州刺史劉道隆以獻

大明五年十月白雀見太原青州刺史劉道隆以獻

大明六年八月辛巳白雀見齊郡青冀二州刺史劉道隆以獻

大明七年四月乙未白雀集廬陵王第廬陵王敬先以獻

大明七年四月乙丑白雀見歷陽太守建平王景素以獻

大明七年五月辛未白雀見汝陰豫州刺史垣護之以獻

大明七年六月白雀見寶成南豫州刺史尋陽王子房以獻

大明七年十月丁卯白雀見建康丹陽尹永嘉王子仁以獻

大明七年十一月車駕南巡隸水師於梁山中江白雀二集華蓋
前廢帝永光元年四月乙亥白雀見會稽東揚州刺史尋陽王子
房以獻

永光元年六月丙子白雀見彭城徐州刺史義陽王昶以聞

明帝太始二年七月戊子白雀見虎檻洲都督征討諸軍建安王
休仁以聞

太始六年七月壬午白雀二見廬陵吉陽內史江孜以聞

明帝太豫元年六月辛丑白雀見廣州刺史孫超以獻

後廢帝元徽五年四月己巳白雀二見尋陽柴桑江州刺史邵陵
王友以獻

孝武帝大明六年三月丙午青雀見華林園

明帝太始二年九月庚寅青雀見京城內南徐州刺史桂陽王休

範以獻

玉馬王者精明尊賢者則出

根車者德及山陵則出

白鳩成湯時來至

魏文帝黃初初郡國十九言白鳩見

吳孫權赤烏十二年八月癸丑白鳩見章安

晉武帝太始八年五月甲辰白鳩二集太廟南門議郎董胃獲以獻

晉武帝太康二年七月白鳩見太僕寺

太康四年十二月白鳩見安定臨涇

太康十年正月乙亥白鳩見河南新城

宋文帝元嘉十八年八月庚午會稽山陰商世寶獲白鳩眼足並
赤揚州刺史始興王濬以獻太子率更令何承天上表曰謹考尋

先典稽之前志王德所覃物以應顯是以玄扈之鳳昭帝軒之鴻
烈豐宮之雀徵姬文之徽祚伏惟陛下重光嗣服永言祖武洽惠
和於地絡燭皇明於天區故能以服混心萬邦含愛員神降祥方
祇薦裕休珍雜杳景瑞畢臻去七月上旬時在昧旦黃暉洞照宇
宙開朗徽風協律甘液灑津雖朱晃瑰瑋於運衡榮光圖靈於河
紀蔑以尚茲臣不量卑情竊慕擊轅有作相杵成謳近又豫白鳩
之觀目翫奇偉心懽盛烈謹獻頌一篇野思古拙意及庸陋不足
以發揮清英敷讚幽旨瞻前顧後亦各其志謹冒以聞其白鳩頌
曰三極協情五靈會性理感冥符道實玄聖於赫有皇先天配命
朝景升躔八維同映休祥載臻榮光播慶宇宙照爛日月光華陶
山練澤是生柔嘉回龙表粹離穗合柯翩翩者鳩亦皎其暉理翩
台領揚鮮帝畿闕四字匪德莫歸暮從儀鳳棲閣廕闡烝哉明后

昧日乾乾惟德之崇其峻如山惟澤之瞻其潤如淵禮樂四達頌
聲遐宣窮髮納貢九譯導言伊昔唐萌愛逢慶祚余生既辰而年
之暮提心命耄式歌王度晨晞永風夕漱甘露思樂靈基不遐有
固

元嘉二十四年九月白鳩又見庚戌中領軍沈演之上表曰臣聞
貞裕之美介於盛王休瑞之臻罔違哲后故鳴鳳表垂衣之化翔
鷦徵解網之仁陛下道德嗣基聖明續世教清鳥紀治昌雲官禮
漸同川澤浹末徼天嘉明懿民樂薰風星辰以之炳煥日月以之
光華神圖祇緯盈觀闕序白質黑章充物靈囿應感之符畢臻而
因心之祥未屬以素鳩自遠迭翰歸飛資性閑淑羽貌鮮麗既聞
之先說又親覩嘉祥不勝藻抃上頌一首辭不稽典分乏采章愧
不足式昭皇慶崇讚盛美益率輿誦備之篇末其頌曰有哲其儀

時惟皓鳩性總五教名編素丘殷曆方昌婉翹來遊漢錄克韓爰
降爰休其一於顯盛宋叡慶遐傳聖皇在上道照鴻軒稱施既平孝
思永言人和於地神豫於天其二禮樂孔秩靈物咸昭白雀集苞丹
鳳棲郊文騶儷跡嘉穎擢苗灼灼縞羽從化馴朝其三豈伊赴林必
周之栩豈伊歸義必商之所惟德是依惟仁是處育景陽嶽濯姿
帝宇其四刑曆頒興理感迭通雉飛越常鷺起西雝烝然戾止實兼
斯容壹茲民聽穆是王風其五
玉羊師曠時來至闕
玉鷄王者至孝則至闕
璧流離王者不隱過則至闕
玉英五常並修則見闕
玄圭水泉流通四海會同則出闕

漢桓帝永興二年四月光祿勳府吏舍夜壁下有青氣得玉鉤玦
各一鉤長七寸三分玦周五寸四分身中雕鏤

晉懷帝永嘉六年二月壬子玉龜出灞水

晉愍帝建興二年十月大將軍劉琨掘地得玉璽使參軍郎碩奉
之歸於京師

建興二年十二月涼州刺史張寔遣使獻行璽一紐封送璽使關
內侯

晉愍帝建武元年三月己酉丹陽江寧民虞由墾土得白麒麟璽
一紐文曰長壽萬年獻晉王

晉成帝咸康八年九月廬江春穀縣留珪夜見門內有光取得玉
鼎一枚外圍四寸豫州刺史路永以獻著作郎曹毗上玉鼎頌

晉安帝義熙十二年六月左衛兵陳陽於東府前淮水中得玉璽

一枚

宋孝武帝大明元年五月戊寅江乘縣民朱伯地中得玉璧徑五寸八分以獻

大明四年二月乙巳徐州刺史劉道隆於汴水得白玉戟以獻

明帝泰始五年十月庚辰郢州獲玄璧廣八寸五分安西將軍蔡興宗以獻

後廢帝元徽四年十一月乙巳吳興烏程余山道人慧獲蒼玉璧太守蕭惠開以獻

金勝國平盜賊四夷賓服則出

晉穆帝永和元年二月春穀民得金勝一枚長五寸狀如織勝明年桓温平蜀

永和元年三月廬江太守路永上言於春穀城北見水岸邊有紫

赤光取得金狀如印遣主簿李邁表送

吳孫皓天璽元年吳郡言掘地得銀一長尺廣三分刻上有年月字丹甌五穀豐孰則出闕

白魚武王度孟津中流入于王舟

宋明帝大始二年十月己巳幸華林天淵池白魚躍入御舟

漢章帝元和三年正月車駕北巡以太牢具祠北岳有神魚躍出十數

金人王者有盛德則游後池闕

木連理王者德澤純洽八方合爲一則爲生

漢章帝元和中木連理生郡國

安帝元初三年正月丁丑東平陵樹連理

漢安帝延光三年七月左馮翊衙有水連理

延光三年七月潁川定臨有木連理

漢桓帝建和二年七月河東有木連理

吳孫權黃武四年六月皖口言有木連理

魏文帝黃初初郡國二言木連理

晉武帝泰始元年十二月木連理生遼東方城

泰始二年八月木連理生河南成臯

泰始八年正月木連理生東平范

泰始八年五月甲辰木連理生東平壽張

泰始八年十月木連理生建寧

晉武帝咸寧元年正月木連理生汝陰南頓

咸寧二年四月木連理生清河靈

咸寧二年六月木連理生燕國

咸寧三年七月壬辰木連理生始平鄠

咸寧四年八月木連理生陳留長垣

咸寧五年木連理生義陽

咸寧五年木連理生樂安臨濟

晉武帝太康元年正月木連理生涪陵永平

太康元年四月木連理生頓丘

太康元年五月木連理二生濟陰乘氏沛國

太康元年七月木連理生馮翊粟邑

太康二年正月木連理生滎陽密

太康二年十月木連理十三生南安源道

太康三年四月木連理生琅邪華

太康三年六月木連理生廣陵海西

太康四年正月木連理生馮翊臨晉蜀郡成都

太康四年十二月木連理生扶風

太康七年三月木連理生河南新安

太康七年六月木連理生始興中宿南鄉范陽

太康八年四月木連理生廬陵東昌

太康八年九月木連理生東萊廬鄉

太康九年九月木連理生陳留浚儀

太康十年十一月木連理生鄱陽鄡鄉

晉武帝太熙元年二月木連理生河南梁

晉惠帝元康元年五月木連理三生成都臨邛

元康元年七月辛丑梁國內史任式上言武平界有柞櫟二樹合

爲一體連理

晉愍帝建興二年三月庚辰木連理生朱提

建興二年三月木連理二生益州雙柏

建興二年六月木連理生襄平

晉愍帝建武元年閏月乙丑木連理生嵩山

建武元年八月甲午木連理生汝陰

建武元年十一月木連理生武昌大將軍王敦以聞

建武元年十一月癸酉木連理生汝陰太守以聞

晉元帝太興元年七月戊辰木連理生武昌大將軍王敦以聞

太興三年十一月木連理生零陵永昌

晉成帝咸和八年五月己巳木連理生昌黎咸和

咸康三年三月庚戌木連理生平州世子府治故園中

咸康七年十二月吳國內史王恬上言木連理生吳縣沙里

晉穆帝永和五年二月癸丑臨海太守藍田侯述言郡界木連理
晉孝武帝寧康三年六月辛卯江寧縣建興里僑民留康家樹異
本連理

晉孝武帝太元十一年四月壬申琅邪費有榆木異根連理相去
四尺九寸

太元十八年十月戊午臨川東興令惠欣之言縣東南溪傍有白
銀樹芳靈樹李樹並連理

太元十九年正月丁亥華林園延賢堂西北李樹連理
太元二十一年正月丙子木連理生南康寧都縣社後

晉安帝隆安三年十一月木連理生汝陽太守垣苗以聞
元興元年正月木連理生泰山武陽

宋文帝元嘉八年四月乙亥東莞莒縣松樹連理太守劉玄以聞

元嘉八年八月木連理生東安新泰縣
元嘉九年六月木連理生滎陽冷道太守展禽以聞

元嘉十二年二月丁卯南郡江陵庾和園甘樹連理荊州刺史臨
川王義慶以獻

元嘉十二年三月馬頭濟陽柞樹連理豫州刺史長沙王義欣以
聞

元嘉十四年二月宮內螽斯堂前梨樹連理豫州刺史長沙王義
欣以聞

元嘉十四年南郡江陵光祿之園甘李二連理
元嘉十五年二月太子家令劉徵園中林檎樹連理徵以聞

元嘉十七年七月武昌崇讓鄉程僧愛家候風木連理江州刺史
臨川王義慶以聞

元嘉十七年十月尋陽弘農祐幾湖芙蓉連理臨川王義慶以聞
元嘉十八年二月木連理生歷陽劉成之家南豫州刺史武陵王
諱以聞

元嘉二十年七月盱眙考城縣柞樹二株連理南兗州刺史臨川
王義慶以聞

元嘉二十年八月木連理生汝陰豫州刺史劉達考以聞

元嘉二十一年木連理生歷陽烏江南豫州刺史武陵王諱以聞

元嘉二十一年木連理生晉陵無錫南徐州刺史南譙王義宣以

聞

元嘉二十二年七月辛巳南頓櫟連理豫州刺史趙伯符以聞

元嘉二十二年九月木連理生建康建康令張永以聞

元嘉二十二年木連理生武昌江州刺史廬陵王紹以聞

元嘉二十三年二月辛亥木連理生南陰柔縣太守以聞

元嘉二十三年木連理生淮南當塗揚州刺史始興王濬以聞

元嘉二十四年二月壬午臨川王第梨樹連理臨川王燁以聞

元嘉二十四年七月壬子晉陵無錫穀櫟樹連理南徐州刺史廣

陵王誕以聞

元嘉二十四年七月乙卯木連理生會稽諸暨揚州刺史始興王

濬以聞會稽太守楊玄保上改連理所生處康亭村為木連理

元嘉二十四年七月乙卯臨川王第梨樹連理臨川王燁以聞

元嘉二十五年四月戊辰木連理生晉陵南徐州刺史廣陵王誕

以聞

元嘉二十八年正月戊子木連理生尋陽柴桑又生州城內江州
刺史建平王宏以聞

元嘉二十九年十月丁未木連理生南琅邪太守劉成以聞
孝武帝孝建二年三月巳酉木連理生南郡江陵荊州刺史朱脩
之以聞

孝建三年五月木連理生北海都昌冀州刺史垣護之以獻

孝建三年七月癸未木連理生歷陽歷陽太守表歆以聞

孝武帝大明元年正月乙亥木連理生高平

大明元年二月壬寅華林園雙橘樹連理

大明元年九月乙丑華林園梨樹連理

大明元年十月丁丑朔木連理生豫章南昌

大明二年四月辛丑木連理生汝南豫州刺史宗慤以聞

大明三年九月甲午木連理生丹陽秣陵材官將軍范悅時以聞

大明四年三月丁亥木連理生華林園曜靈殿北

大明四年四月壬子木連理生華林園日觀臺北

大明四年六月戊戌木連理生會稽山陰揚州刺史西陽王子尚
以聞

大明五年閏九月木連理生邊城豫州刺史垣護之以聞

大明五年十二月戊寅淮南松木連理豫州刺史尋陽王子房以

聞

大明六年二月乙丑木連理生晉陵南徐州刺史新安王子鸞以
聞

大明六年四月戊辰木連理生營陽湘州刺史建安王休仁以聞

大明六年八月乙丑木連理生彭城城內徐州刺史王玄謨以聞

大明七年正月巳酉珊瑚連理生鬱林始安太守劉劭以聞

明帝泰始二年十一月木連理生丹陽秣陵

泰始四年三月庚戌太子西池冬生樹連理園丞周禽倚以獻
泰始六年四月景午木連理生會稽永興太守蔡興宗以聞
泰始六年十二月壬辰木連理生豫章南昌太守劉愔之以聞
泰始七年二月戊寅木連理生吳郡錢唐太守王延之以聞
昇明二年木連理生豫州界內史劉懷珍以聞
比目魚王者德及幽隱則見

珊瑚鉤王者恭信則見

芝草王者慈仁則生食之令人度世

漢武帝元封二年甘泉宮內產芝九莖連葉

漢宣帝元康四年金芝九莖產於函德殿銅池中

漢明帝永平十七年春芝生前殿

漢明帝建和元年四月芝草生中黃藏府

宋順帝昇明二年宣城山中生紫芝一株在所獲以獻

明月珠王者不盡介鱗之物則出

漢高后景帝時會稽人朱仲獻三寸四寸珠

漢章帝元和中郡國獻明珠

巨鬯三禺之禾一稔二米王者宗廟修則出

黃帝時南夷乘白鹿來獻鬯

漢章帝元和中秬秠生郡國

華平其枝正平王者有德則生德剛則仰德弱則低

漢章帝元和中華平生郡國

平露如蓋以察四方之政其國不平則隨方而傾

蓂莢一名曆莢夾階而生一日生一葉從朔而生望而止十六日
日落一葉若月小則一葉萎而不落堯時生階

萑甫一名倚扇狀如蓬大枝葉小根根如絲轉而成風殺蠅堯時生於厨

朱草草之精也世有聖人之德則生

漢光武建武元年五月京師有赤草生水涯

魏文帝初朱草生文昌殿側

漢章帝元和中朱草生郡國

宋文帝元嘉十一年朱草生蜀郡郫縣王之家益州刺史甄法崇以聞

景星大星也狀如半月於晦朔助月為明

賓連闕達生於房室王者御后妃有節則生

渠搜禹時來獻裘

浪井不鑿自成王者清靜則應

西王母舜時來獻白環白瑄

越裳周公時來獻白雉象牙

漢平帝元始元年正月越裳重譯獻白雉一黑雉二詔二公薦宗廟

漢光武建元十三年九月南越獻白雉

漢章帝元和中白雉見郡國

漢桓帝永康元年十一月白雉見西河

漢獻帝延康元年四月丁巳饒安縣言白雉見又郡國十九言白雉見

晉武帝咸寧元年四月丁巳白雉見安豐松滋

咸寧元年十二月丙午白雉見梁國睢陽梁王彤獲以獻

咸寧三年十一月白雉見渤海饒安相阮溫獲以獻

晉武帝太康元年庚戌白雉見中山

晉愍帝建興三年十二月戊午白雉見襄平

建興三年十二月戊午白雉見

晉安帝義熙七年五月白雉見豫章南昌

宋文帝元嘉五年五月庚辰白雉見東莞莒縣太守劉玄以聞

元嘉十六年二月白雉見陳郡豫州刺史長沙王義欣以獻

元嘉十八年二月癸亥白雉見南汝陰宋縣太守文道恩以獻

元嘉二十年六月白雉見高平方與縣徐州刺史臧質以獻

元嘉二十六年三月戊寅白雉見東安沛郡各一徐兗二州刺史

武陵王獲以獻

孝武帝大明二年三月己巳白雉雌雄各一見海陵南兗州刺史

竟陵王誕以獻

大明五年十二月白雉見秦郡南兗州刺史晉安王子勛以獻

大明八年二月丁卯白雉見南郡江陵荆州刺史臨海王子玉以

獻

前廢帝永光元年正月丙午白雉見渤海青州刺史王玄謨以獻

永光元年三月甲午朔白雉見新蔡豫州刺史劉德願以獻

黃銀紫玉王者不藏金玉則黃銀紫玉光見深山

宋明帝泰始二年八月於赭圻城南得紫玉一段圍三尺二寸長

一尺厚七尺太宗攻爲二爵以獻武文二廟

玉女天賜妾也禮舍文嘉曰禹卑宮室盡力溝洫百穀用成神龍

女降闕

地珠王者不以財爲寶則生珠闕

天鹿者純靈之獸也五色彩耀洞明王者道備則至闕

角端者日行萬八千里又曉四夷之語明君聖主在位明達外方幽遠之事則奉書而至闕

周印者神獸之名也星宿之變化王者德盛則至闕

飛菟者神馬之名也日行三萬里禹治水勤勞歷年救民之害天應其德而至闕

澤獸黃帝時巡狩至於東濱澤獸出能言達知萬物之精以戒於民為時除害賢君明德幽遠則來闕

餘者幽隱之獸也有明王在位則來為時辟除災害闕

騶曩者神馬也與飛菟同亦各隨其方而至以明君德也闕

同心鳥王者德及遐方四夷合同則至闕

跌蹄者后土之獸自能言語王者仁孝於國則來禹治水而至闕

紫達王者仁義行則見闕

小鳥生大鳥王者土地開闢則至闕

河精者人頭魚身師曠時所受讖也闕

延嬉王者孝道行則至闕

大貝王者不貪財實則出闕

威蕤王者禮備則生於殿前闕

醴泉水之精也甘美王者修理則出

漢光武建武中元元年五月醴泉出京師及郡國飲醴泉者痼病皆愈獨眇者蹇者不差

魏文帝初郡國二言醴泉出

宋文帝元嘉十二年衡陽湘鄉醴泉出縣庭荊州刺史臨川王義慶以聞

孝武帝孝建三年九月甲戌細仗隊省井泉春夏深不盈尺忽至

一丈有五色水清澄醴味汲引不窮

孝武帝大明二年三月壬子北汝陰樓煩平地出醴泉豫州刺史

宗慤以聞

明帝泰豫元年四月乙酉會稽山陰思義醴泉出太守蔡興宗以

聞

日月揚光日者人君象也人君不假臣下之權則日月揚光明

芝英者王者親近耆老養有道則生

漢章帝元和中芝英生郡國

碧石者玩好之物棄則至

玉壅者不汲而滿王者清廉則出

山車者山藏之精也不藏金玉山澤以時通山海之饒以給天下

則山成其車

雞駭犀王者賤難得之物則出

陵出黑丹王者修至孝則出

神鼎者質文之精也知吉知凶能重能輕不炊而沸五味自生王

者盛德則出

漢武帝元鼎元年五月五日得鼎汾水上

漢明帝永平六年三月廬江大守獻寶鼎出王雒山

漢章帝建初七年十月車駕西巡至槐里右扶風禁上美陽得銅

器於岐山似酒尊詔在道晨夕以為百官熱酒

漢和帝永元元年竇憲征匈奴於漠北酒泉得仲山甫鼎容五斗

吳孫權赤烏十二年六月戊戌寶鼎出臨平湖又出東部鄴縣

吳孫皓寶鼎元年八月在所言得大鼎

晉愍帝建興二年十二月晉陵武進縣民陳龍在田中得銅鐸五

枚

晉成帝咸和元年十月辛卯宣城春穀縣山岸崩獲石鼎重二斤受斛餘

晉成帝咸康五年豫章南昌民掘地得銅鍾四枚太守褚裒以獻

晉穆帝升平五年二月乙未南掖門有馬足陷地得銅鍾一枚

宋文帝元嘉十三年四月辛丑武昌縣章山水側自開出神鼎江

州刺史南譙王義宣以獻

元嘉十九年九月戊申廣陵肥如石梁澗中出石鍾九口大小行

次引列南向南兗州刺史臨川王義慶以獻

元嘉二十一年十二月新陽獲古鼎於水側有家書四十二字雍

州刺史蕭思話以獻

元嘉二十二年豫章豫寧縣出銅鍾江州刺史廣陵王紹以獻

孝武帝孝建三年四月丁亥臨川宜黃縣民田中得銅鍾七口內

史傳徽以獻

孝建三年四月甲辰晉陵延陵得古鍾六口徐州刺史竟陵王誕以獻

孝武帝大明七年六月江夏蒲圻獲銅路鼓四面獨足郢州刺史

安陸王子綏以獻

明帝泰始四年二月丙申豫章望蔡獲古銅鍾高一尺七寸圍二

尺八寸太守張辯以獻

泰始五年五月壬戌豫章南昌獲古銅鼎容斛七斗江州刺史王

景文以獻

泰始七年六月甲寅義陽郡獲銅鼎受一斛并蓋並隱起鏤豫州

刺史段仙榮以獻

順帝昇明二年九月建寧萬歲山澗中得銅鍾長二尺一寸豫州刺史劉懷珍以獻

漢宣帝元康二年夏神雀集雍

元康三年春神雀集泰山

宣帝元康二年春五色雀以萬數飛過屬縣

元康四年三月神雀五采以萬數飛過集長樂未央北宮高寢甘

泉泰時殿元康四年神雀仍集

漢宣帝五鳳三年正月神雀集京師

漢明帝永平十七年春神雀五色集京師

漢章帝元和中神雀見郡國

宋文帝元嘉二十二年白雀見新野鄧縣雍州刺史蕭思話以聞

元嘉二十六年五月癸酉白鵲見建長崇孝里揚州刺史始興王

濬以獻

孝武帝大明七年三月辛巳白鵲見汝南安陽太守申令孫以獻

晉惠帝永嘉元年五月白鼠見東宮皇太子獲以獻

宋明帝泰始三年二月壬寅白鼠見樂安青州刺史沈文秀以獻

漢昭帝始元元年二月黃鵠下建章宮太液池中

漢章帝元和二年正月車駕東巡柴祭岱宗禮畢黃鵠三十從西

南來經祠壇上東北過

漢武帝太初三年二月五日行幸東海獲赤雁

魏文帝初鑊中生赤魚

孫權時神雀巢朱雀門

孫皓天璽元年臨海郡吏伍曜在海邊得石樹高二尺餘枝莖

紫色詰屈傾靡有光采山海經所載玉碧樹之類也

晉武帝太始二年六月壬申白鴿見酒泉延壽延壽長王音以獻
晉成帝咸和九年五月癸酉白鵝見吳國錢唐內史虞潭以獻

安帝義熙元年南康雩都嵩山有金雞青黃色飛集巖間

宋文帝元嘉二十二年湘州刺史南平王鑠獻赤鸚鵡

孝武帝大明三年正月丙申嬖皇國獻赤白鸚鵡各一

宋文帝元嘉二十四年十月甲午揚州刺史始興王濬獻白鸚鵡

孝武帝大明五年正月丙子交州刺史垣閎獻白孔雀

明帝泰始三年五月乙亥白鴿鴝見京兆雍州刺史巴陵王休若
以獻

漢桓帝延熹九年四月濟陰東郡濟北平原河水清

宋文帝元嘉二十四年二月戊戌河濟俱清龍驤將軍青冀二州
刺史杜坦以聞

文帝元嘉二十五年五月征北長史廣陵太守范邈上言所領輿
縣前有大浦控引潮流水常淤濁自此以來源流清潔纖鱗呈形
古老相傳以爲休瑞

孝武帝孝建三年九月濟河清冀州刺史垣護之以聞

孝武帝大明五年九月庚戌河濟俱清平原太守申纂以聞

明帝泰始元年二月丙寅揚淮水清潔有異於常州治中從事史
張緒以聞

漢光武建武初野繭穀充給百姓其後耕蠶稍廣二事漸息

吳孫權黃龍三年夏野蠶繭大如卵

宋文帝元嘉十六年宣城宛陵廣野蠶成繭大如雉卵彌漫林谷
年年轉盛

孝武帝大明三年五月癸巳宣城宛陵縣石亭山生野蠶三百餘

里太守張辯以聞

孝武帝大明三年十一月己巳肅慎氏獻楛矢石弩高麗國譯而至

大明五年正月戊午元日花雪降殿庭時右衛將軍謝莊下殿雪集衣還白上以爲瑞於是公卿並作花雪詩史臣按詩云先集爲霰韓詩曰霰英也花葉謂之英離騷云秋菊之落英左思云落英飄颻是也然則霰爲花雪矣草木花多五出花雪獨六出

明帝泰始二年五月甲寅赭中獲石栢長三尺二寸廣三尺五寸揚州刺史建安王休仁以獻

泰始三年十一月乙卯盱眙獲石栢寧朔將軍段榮以獻

漢和帝在位十七年郡國言瑞應八十餘品帝讓而不宣

宋書卷二十九 志第十九

魏州生鳳臺氏雷宿甫

宋書卷三十

志第二十

五行一

昔八卦兆而天人之理著九疇序而帝王之應明雖可以知從德獲自天之祐違道陷神聽之臯然未詳舉徵效備考幽明雖時剝鼎雉庭穀之異然而未究者衆矣至於鑑悟後王多有所闕故仲尼作春秋具書祥告以驗行事是則九疇陳其義於前春秋列其效於後也逮至伏生荆紀大傳五行之體始詳劉向廣演鴻範休咎之文益備故班固斟酌經傳詳紀條流誠以一王之典不可獨闕故也夫天道雖無聲無臭然而應若影響天人之驗理不可誣司馬彪纂集光武以來以究漢事王沈魏書志篇闕凡厥災異但編帝紀而已自黃初以降二百餘年覽其災妖以考之事常若重

魏州生鳳臺氏雷宿甫

規沓矩不謬前說又高堂隆郭景純等據經立辭終皆顯應闕而不序史體將虧今自司馬彪以後皆撰次論序斯亦班固遠采春秋舉遠明近之例也又按言之不從有介蟲之孽劉歆以爲毛蟲視之不明有羸蟲之孽劉歆以爲羽蟲按月令夏蟲羽秋蟲毛宜如歆說是以舊史從之五行精微非末學所究凡已經前議者並卽其言以釋之未有舊說者推準事理以俟來哲

五行傳曰田獵不宿飲食不享出入不節奪民農時及有好謀則木不曲直謂木失其性而爲災也又曰貌之不恭是謂不肅厥咎狂厥罰恒雨厥極惡時則有服妖時則有龜孽時則有雞禍時則有下體生上之痾時則有青雉青祥惟金沴木班固曰蓋工匠爲輪矢者多傷敗及木爲變怪皆爲不曲直也

木不曲直

魏文帝黃初六年正月雨水冰按劉歆說木不曲直也劉向曰冰者陰之盛木者少陽貴臣象也此人將有害則陰氣脅木木先寒故得雨而冰也是年六月利成郡兵蔡方等殺太守徐質據郡反多所脅略并聚亡命遣二校尉與青州刺史共討平之太守古之諸侯貴臣有害之應也一說以木冰爲甲兵之象是歲旣討蔡方又八月天子自將以舟師征吳戎卒十餘萬連旂數百里臨江觀兵

晉元帝太興三年二月辛未雨水冰後二年周顛戴淵刁協劉隗皆遇害與春秋同事是其應也一曰是後王敦攻京師又其象也晉穆帝永和八年正月乙巳雨水冰是年殷浩北伐明年軍敗十年廢黜又曰荀羨殷浩北伐桓溫入關之象也

晉孝武帝太元十四年十二月乙巳雨水冰明年二月王恭爲北

蕃八月庾楷爲西蕃九月王國寶爲中書令尋加領軍將軍十七年殷仲堪爲荊州雖邪正異規而終同摧滅是其應也一曰苻堅雖敗關河未一丁零鮮卑侵略司寇寶揚勝扇逼梁雖兵役不已又其象也

吳孫亮建興二年諸葛恪征淮南行後所坐聽事棟中折恪妄興徵役奪民農時作爲邪謀傷國財力故木失其性致毀折也及旋師而誅滅於周易又爲棟橈之凶也

晉武帝太康五年五月宣帝廟地陷梁折八年正月太廟殿又陷改作廟築基及泉其年九月遂更營新廟遠致名材雜以銅柱陳騶爲匠作者六萬人十年四月乃成十一月庚寅梁又折按地陷者分離之象梁折者木不曲直也孫盛曰于時後宮殿有孽火又廟梁無故自折先是帝多不豫益惡之明年帝崩而王室頻亂遂

十天下

晉惠帝太安二年成都王穎使陸機率衆向京師擊長沙王又軍始引而牙竿折俄而戰敗機被誅穎尋奔潰卒賜死初河間王顥謀先誅長沙廢太子立穎長沙知之誅其黨卞粹等故穎來伐機又以穎得遐邇心將爲漢之代王遂委質於穎爲犯從之將此皆奸謀之罰木不曲直也

王敦在武昌鈴下儀仗生華如蓮花狀五六日而萎落此木失其性而爲變也干寶曰鈴閣尊者之儀鈴下主威儀之官今狂花生於枯木又在鈴閣之間言威儀之富榮華之盛皆如狂花之發不可久也其後終以逆命沒又加戮是其應也一說此花孽也於周易爲枯楊生華

桓玄始篡龍旂竿折玄田獵出入不絕昏夜飲食恣麥土木妨農

又多奸謀故木失其性也夫旂所以擬三辰章著明也旂竿之折
高明去矣在位八十日而敗

宋明帝泰始二年五月丙午南琅邪臨沂黃城山道士盛道度堂
屋一柱自然夜光照室內此木失其性也或云木腐自光

廢帝昇明元年吳興餘杭舍亭禾藿樹生李實禾藿樹民間所謂
胡頹樹

貌不恭

魏文帝居諒闇之始便數出游獵體貌不重風尚通脫故戴凌以
直諫抵罪鮑勛以迂旨極刑天下化之咸賤守節此貌之不恭也
是以享國不永後祚短促春秋魯君居喪不哀在感而有嘉容穆
叔謂之不度後終出奔葢同事也

魏尚書鄧颺行步施縱筋不束體坐起傾倚若無手足此貌之不

恭也管輅謂之鬼躁鬼躁者凶終之徵後卒誅死

晉惠帝元康中貴遊子弟相與爲散髮裸身之飲對弄婢妾逆之
者傷好非之者負譏希世之士耻不與焉蓋胡翟侵中國之萌也
豈徒伊川之民一被髮而祭者乎

晉惠帝元康中賈謐親貴數入二宮與儲君遊戲无降下心又嘗
同奕棋爭道成都王穎厲色曰皇太子國之儲貳賈謐何敢無禮
謐猶不悛故及於禍

齊王冏既誅趙倫因留輔政坐拜百官符敕臺府淫營專驕不一
朝覲此狂恣不肅之容也天下莫不高其功而慮其亡也冏終弗
改遂至夷滅

太元中人不復著幘頭頭者元首幘者令髮不垂助元首爲儀飾
者也今忽廢之若人君獨立無輔以至危亡也其後桓玄篡位

舊爲屐者齒皆達榻上名曰露卯太元中忽不徹名曰陰卯其後多陰謀遂致大亂

晉安帝義熙七年晉朝拜授劉毅世子毅以王命之重當設饗宴親請吏佐臨視至日國僚不重白默拜於廡中王人將反命毅方知大以爲恨免郎中令劉敬叔官識者怪焉此墮略嘉禮不肅之妖也

陳郡謝靈運有逸才每出入自扶掖者常數人民間謠曰四人挈衣裾三人捉坐席是也此蓋不肅之咎後坐誅

宋明帝泰始中幸臣阮佃夫勢傾朝廷室宇豪麗車服鮮明乘車常偏向一邊違正立執綏之體時人多慕効此亦貌不恭之失也時偏左之化行方正之道廢矣

後廢帝常單騎遊遨出入市里營寺未常御輦終以殞滅

恒雨

魏明帝太和元年秋數大雨多暴雷電非常至殺鳥雀案楊阜上疏此恒雨之罰也時帝居喪不哀出入弋獵無度奢侈繁興奪民農時故木失其性而恒雨爲災也

太和四年八月大雨霖三十餘日伊洛河漢皆溢歲以凶饑

孫亮太平二年二月甲寅大雨震電乙卯雪大寒案劉歆說此時當雨而不當大大雨恒雨之罰也於始震電之明日而雪大寒又恒寒之罰也劉向以爲旣已震雷則雪不當復降皆失時之異也天戒若曰爲君失時賊臣將起先震雷而後雪者陰見間隙起而勝陽逆殺之禍將及也亮不悟尋見廢此與春秋魯隱同也

晉武帝泰始六年六月大雨霖甲辰河洛沁水同時並溢流四千九百餘家殺二百餘人沒秋稼千三百六十餘頃晉武太康五年

七月任城梁國暴雨害豆麥太康五年九月南安霖雨暴雪折樹木害秋稼魏郡淮南平原雨水傷秋稼是秋魏郡西平郡九縣霖雨暴雨霜傷秋稼

晉惠帝永寧元年十月義陽南陽東海霖雨淹害秋麥

晉成帝咸康元年八月乙丑荊州之長沙攸醴陵武陵之龍陽三縣雨水浮漂屋室殺人傷損秋稼

宋文帝元嘉二十一年六月京邑連雨百餘日大水

孝武帝大明元年正月京邑雨水

大明五年七月京邑雨水

大明八年八月京邑雨水

明帝太始二年六月京邑雨水

順帝昇明三年四月乙亥吳郡桐廬縣暴風雷電揚砂折木水平

地二丈流漂居民

服妖

魏武帝以天下凶荒資財乏匱始擬古皮弁裁縑帛爲白帟以易舊服傅玄曰白乃軍容非國容也于寶以爲縞素凶喪之爲帟毀辱之言也蓋革代之後攻殺之妖也初爲白帟橫縫其前以別後名之曰顏俗傳行之至晉永嘉之間稍去其縫名無顏帟而婦人束髮其緩彌甚紛之堅不能自立髮被于額目出而已無顏者愧之言也覆額者慙之貌其緩彌甚言天下忘禮與義放縱情性及其終極至乎大耻也永嘉之後二帝不反天下媿焉魏明帝著繡帽被縹紈半袖嘗以見直臣楊阜阜諫曰此於禮何法服邪帝默然近服妖也縹非禮之色褻服不貳今之人主親御非法之章所謂自作孽不可禳也帝既不享永年身沒而祿去王室後嗣不終

遂亡天下

魏明帝景初元年發銅鑄爲巨人二號曰翁仲置之司馬門外案古長人見爲國亡長狄見臨洮爲秦亡之禍始皇不悟反以爲嘉祥鑄銅人以象之魏法亡國之器而於義竟無取焉蓋服妖也魏尚書何晏好服婦人之服傅玄曰此服妖也夫衣裳之制所以定上下殊內外也大雅云玄袞赤舄鉤膺鏤錫歌其文也小雅云有嚴有翼共武之服詠其武也若內外不殊王制失敘服妖旣作身隨之亡妹喜冠男子之冠桀亡天下何晏服婦人之服亦亡其家其咎均也

吳婦人之修容者急束其髮而削角過于耳蓋其俗自操束大急而廉隅失中之謂也故吳之風俗相驅以急言論彈射以刻薄相尚居三年之喪者徃徃有致毀以死諸葛患之著正交論雖不可以經訓整亂蓋亦救時之作也孫休後衣服之制上長下短又積領五六而裳居一二于寶曰上饒奢下儉逼上有餘下不足之妖也至孫皓果奢暴恣情於上而百姓彫困於下卒以亡國是其應也晉興後衣服上儉下豐著衣者皆厭褻蓋羣君衰弱臣放縱下掩上之象也陵遲至元康末婦人出兩襜加乎脛之上此內出外也爲車乘者苟貴輕細又數變易其形皆以白篋爲純古喪車之遺象乘者君子之器蓋君子立心無恒事不崇實也于寶曰及晉之禍天子失柄權制寵臣下掩上之應也永嘉末六宮才人流徙戎翟內出外之應也及天下亂擾宰輔方伯多負其任又數改易不崇實之應也

晉武帝泰始後中國相尚用胡牀貂盤及爲羗煮貂炙貴人富室必置其器吉享嘉會皆此爲先太康中天下又以氈爲紉頭及絡

帶衿口百姓相戲曰中國必爲胡所破也氈產於胡而天下以爲
紉頭帶身衿口胡旣三制之矣能無敗乎于寶曰元康中氐羌反
至于永嘉劉淵石勒遂有中都自後四夷迭據華土是其應也
晉武帝太康後天下爲家者移婦人於東方空萊北庭以爲園囿
于寶曰夫王朝南向正陽也后北宮位太陰也世子居東宮位少
陽也今居內於東是與外俱南面也亢陽無陰婦人失位而干少
陽之象也賈后讒戮愍懷俄而禍殃亦及

昔初作履者婦人員頭男子方頭員者順從之義所以別男女也
晉太康初婦人皆履方頭此去其員從與男無別也

太康之中天下爲晉世寧之舞手接栝槃反覆之歌曰晉世寧舞
栝槃夫樂生人心所以觀事故記曰總干山立武王之事也發揚
蹈厲太公之志也武亂皆坐周召之治也又曰其治民勞者舞行
綴遠其治民逸者舞行綴近今接栝槃於手上而反覆之至危也
栝槃者酒食之器也而名曰晉世寧者言晉世之士偷苟於酒食
之間而其知不及遠晉世之寧猶栝槃之在手也

晉惠帝元康中婦人之飾有五兵佩又以金銀瑋瑁之屬爲斧鉞
戈戟以當笄 于寶曰男女之別國之大節故服物異等贄幣不
同今婦人而以兵器爲飾又妖之大也遂有賈后之事終以兵亡
天下

元康中婦人結髮者旣成以繒急束其環名曰櫛子紒始自中宮
天下化之其後賈后果害太子

元康中天下始相倣爲楊杖以柱掖其後稍施其錁住則植之夫
木東方之行金之臣也杖者扶體之器楊其頭者尤便用也必傍
柱掖者傍救之象也王室多故而元帝以蕃臣樹德東方維持天

下柱掖之應也至社稷無主海內歸之遂承天命建都江外獨立之應也

元康末至太安間江淮之城有敗編自聚于道多者或至四五十量于寶嘗使人散而去之或投林艸或投坑谷明日視之悉復如故民或云見狸銜而聚之亦未察也寶說曰夫編者人之賤服最處于下而當勞辱下民之象也敗者疲斃之象也道者地理四方所以交通王命所由往來也故今敗編聚於道者象下民罷病將相聚爲亂絕四方而壅王命之象也在位者莫察太安中癸壬午兵百姓鬻怨江夏男子張昌遂首亂荆楚從之者如流於是兵革歲起天下因之遂大破壞此近服妖也

晉孝懷永嘉以來士大夫竟服生箋單衣遠識者怪之竊指擿曰此則古者總衰之布諸侯大夫所以服天子也今無故畢服之殆有應乎其後愍懷晏駕不獲厥所

晉元帝太興以來兵士以絳囊縛紛紛在首莫上焉周易乾爲首坤爲囊坤臣道也晉金行赤火色金之賊也以朱囊縛紛臣道上侵之象也到永昌元年大將軍王敦舉兵內攻六軍散潰

舊爲羽扇柄刻木象其骨形羽用十取全數也晉中興初王敦南征始改爲長柄下出可捉而減其羽用八識者尤之曰夫羽扇翼之名也創爲長柄者執其柄制羽翼也以八改十者將以未備奪已備也是時爲衣者又上短帶至于掖著帽者以帶縛項下逼上上無地也下袴者直幅爲口無殺下大失裁也尋有兵亂三年而再攻京師晉海西初嗣位迎官忘設豹尾識者以爲不終之象近服妖也

晉司馬道子於府北園內爲酒鑪列肆使姬人酤鬻酒肴如禪販

者數遊其中身自買易因醉寓寢動連日夜漢靈帝嘗若此于寶以爲君將失位降在皂隸之象也道子卒見廢徙以庶人終

桓玄篡立殿上施絳綾帳鏤黃金爲顏四角金龍銜五色羽葆流蘇羣下竊相謂曰頗類輜車此服妖也

晉末皆冠小冠而衣裳博大風流相倣輿臺成俗識者曰此禪代之象也永初以後冠還大云

宋文帝元嘉六年民間婦人結髮者三分髮抽其髮直向上謂之飛天紒始自東府流被庶民時司徒彭城王義康居東府其後卒以陵上徙廢

孝武帝世豫州刺史劉德願善御車世祖嘗使之御畫輪幸大宰江夏王義恭第德願挾牛杖催世祖云日暮宜歸又求益僦車世祖甚懽此事與漢靈帝西園蓄私錢同也

孝武世幸臣戴法興權亞人主造員頭履世人莫不効之其時員進之俗大行方格之風盡矣

明帝初司徒建安王休仁統軍赭圻制烏紗帽反抽帽裙民間謂之司徒狀京邑翕然相尚休仁後果以疑逼致禍

龜孽

晉惠帝永熙初衛瓘家人炊飯墮地盡化爲螺出足起行螺龜類近龜孽也于寶曰螺被甲兵象也於周易爲离离爲戈兵明年瓘

誅

雞禍
魏明帝景初二年廷尉府中有雌雞變爲雄不鳴不將于寶曰是歲晉宣帝平遼東百姓始有與能之議此其象也然晉二后並以人臣終不鳴不將又天意也

晉惠帝元康六年陳國有雞生雄雞無翅旣大墜坑而死王隱曰
雄胤嗣象坑地事爲母象賈后誣殺愍懷殆其應也

晉惠帝太安中周玘家有雌雞逃承雷中六七日而下奮翼鳴將
獨毛羽不變其後有陳愍之事愍雖控制江表終無綱紀文章殆
其象也卒爲玘所滅雞禍見玘家又天意也

晉元帝太興中王敦鎮武昌有雌雞化爲雄天戒若曰雌化爲雄
臣陵其上其後王敦再攻京師

晉孝武大元十三年四月廣陵高平閭嵩家雄雞生無右翅彭城
到象之家雞無右足京房易傳曰君用婦人言則雞生妖

晉安帝隆安元年八月琅邪王道子家青雌雞化爲赤雄不鳴不
將後有桓玄之事具如其象

隆安四年荊州有雞生角角尋墮落是時桓玄始擅西夏狂慢不

肅故有雞禍角兵象尋墮落者暫起不終之妖也

晉安帝元興二年衡陽有雌雞化爲雄八十日而冠萎衡陽桓玄
楚國封略也後篡位八十日而敗徐廣以爲玄之象也

宋文帝元嘉十二年華林園雌雞漸化爲雄後孝武卽位皇太后
令行於外亦猶漢宣帝時雌雞爲雄至哀帝時元后與政也

明帝泰始中興東遷沈法符家雞有四距
青青青祥

晉武帝咸康元年八月丁酉大風折太社樹有青氣出焉此青祥
也占曰東莞當有帝者明年元帝生是時帝大父武王封東莞由
是徙封琅邪孫盛以爲中興之表晉室之亂武帝子孫無子遺社
樹折之應又恒風之罰也

晉惠帝元康中洛陽南山有畜作聲曰韓屍屍識者曰韓氏將死

也言屍屍者盡死意也其後韓謚誅而韓族殲焉此青祥也
金沴木

魏文帝黃初七年正月幸許昌許昌城南門無故自崩帝心惡之遂不入還洛陽此金沴木木動也五月宮車晏駕京房易傳曰上下咸悖厥妖城門壞

晉元帝太興二年六月吳郡米廩無故自壞是歲大饑死者數千晉明帝太寧元年周延自歸王敦既立宅宇而所起五間六架一時躍出墮地餘桁猶亘柱頭此金沴木也明年五月錢鳳謀亂遂族滅延而胡孰尋亦爲墟矣

晉安帝元興元年正月丙子司馬元顯將西討桓玄建牙揚州南門其東者難立良久乃正近沴妖也尋爲桓玄所禽

元興三年五月樂賢堂壞天意若曰安帝嚚眊不及有樂賢之心

故此堂見沴也

晉安帝義熙九年五月乙酉國子聖堂壞

宋文帝元嘉十七年劉斌爲吳郡郡堂屋西頭鴟尾無故落地治之未畢東頭鴟尾復落頃之斌誅

魏世張掖石瑞

氏雷定南甫

五行二

五行傳曰好戰攻輕百姓飾城郭侵邊境則金不從革謂金失其性而為災也又曰言之不從是謂不义厥咎僭厥罰恒暘厥極憂時則有詩妖時則有介蟲之孽時則有犬禍時則有口舌之病時則有白青白祥惟木沴金介蟲劉歆傳以為毛蟲金不從革

魏世張掖石瑞雖是晉氏之符命而於魏為妖好攻戰輕百姓飾城郭侵邊境魏氏三祖皆有其事劉歆以為金石同類石圖發非常之文此不從革之異也晉定大業多敝曹氏石瑞文大討曹之應也

魏明帝青龍中盛修宮室西取長安金狄承露槃折聲聞數十里金狄泣於是因留霸城此金失其性而爲異也

吳時歷陵縣有巖穿似印或云石印封發天下太平孫皓天璽元年印發又陽羨山有石穴長十餘丈皓初修武昌宮有遷都之意是時武昌爲離宮班固云離宮與城郭同占飾城郭之謂也寶鼎三年皓出東關遣丁奉至合肥建衡三年皓又大舉出華里侵邊境之謂也故令金失其性卒面縛而吳亡

晉惠帝永興元年成都伐長沙每夜戈戟鋒有火光如縣燭此輕民命好攻戰金失其性而爲變也天戒若曰兵猶火也不戢將自焚成都不能終以敗亡

晉懷帝永嘉元年項縣有魏豫州刺史賈逵石碑生金可采此金不從革而爲變也五月汲桑作亂羣寇颺起

晉清河王覃爲世子時所佩金鈴忽生起如粟者康王母疑不祥毀棄之及後爲惠帝太子不終於位卒爲司馬越所殺

晉元帝永昌元年甘卓將襲王敦既而中止及還家多變怪照鏡不見其頭此金失其性而爲妖也尋爲敦所襲遂夷滅

石虎時鄴城鳳陽門上金鳳皇二頭飛入漳河

晉海西太和中會稽山陰縣起倉鑿地得兩大船滿中錢錢皆輪文大形時日向莫鑿者馳以告官官夜遣防守甚嚴至明旦失錢所在唯有船存視其狀悉有錢處

晉安帝義熙初東陽太守殷仲文照鏡不見其頭尋亦誅翦占與甘同

宋後廢帝元徽四年義熙晉陵二郡並有霹靂車墜地如青石草木焦死

言之不從

魏齊王嘉平初東郡有譎言云白馬河出妖馬夜過官牧邊嗚呼衆馬皆應明日見其迹大如斛行數里還入河楚王彪本封白馬兗州刺史令狐愚以彪有智勇及聞此言遂與王凌謀共立之遣人謂曰天下事未可知願王自愛彪答曰知厚意事泄凌愚被誅彪賜死此言不從之罰也詩云民之譎言寧莫之懲

劉禪嗣位譙周引晉穆侯漢靈帝命子事譏之曰先主諱備其訓具也後主諱禪其訓授也若言劉已具矣當授與人甚於穆侯靈帝之祥也蜀果亡此言之不從也

劉備卒劉禪卽位未葬亦未踰月而改元爲建興此言之不從也習鑿齒曰禮國君卽位踰年而後改元者緣臣子之心不忍一年而有二君也今可謂亟而不知禮矣君子是以知蜀之不能東遷

也後又降晉吳孫亮晉惠帝宋元凶亦然亮不終其位惠帝號令非已元凶尋誅言不從也

魏太和中姜維歸蜀失其母魏人使其母手書呼維令反并送當歸以譬之維報書曰良田百頃不計一畝但見遠志無有當歸維卒不免魏明帝景初元年有司奏帝爲烈祖與太祖高祖並爲不毀之廟從之按宗廟之制祖宗之號皆身沒名成乃正其禮故唯功赫天壤德邁前王未有豫定之典此蓋言之不從失之甚者也後二年而宮車晏駕於是統微政逸

吳孫休世烏程民有得困疾及差能以嚮言者言於此而聞於彼自其所聽之不覺其聲之大也自遠聽之如人對言不覺聲之自遠來也聲之所往隨其所向遠者不過十數里其隣人有責息於外歷年不還乃假之使爲責讓懼以禍福負物者以爲鬼神卽傾

倒畀之其人亦不自知所以然也言不從之咎也

魏世起安世殿晉武帝後居之安世武帝字也晉武帝每延羣臣多說平生常事未常及經國遠圖此言之不從也何曾謂子遵曰國家無貽厥之謀及身而已後嗣其殆乎此子孫之憂也自永熙後王室漸亂永嘉中天下大壞及何綏以非辜被誅皆如曾言趙王倫廢惠帝於金墉城改號金墉爲永安宮帝尋復位而倫誅晉惠帝永興元年詔廢太子覃還爲清河王立成都王穎爲皇太子猶加侍中大都督領丞相備九錫封二十郡如魏王故事案周禮傳國以胤不以勳故雖公且之聖不易成王之嗣所以遠絕覬覦永壹宗祧後代遵履改之則亂今擬非其實僭差已甚且旣爲國副則不應復開封土兼領庶職此言之不從進退乖爽故帝旣播越穎亦不終是其咎也後猶不悟又立懷帝爲皇太弟懷終流

弒不永厥祚又其應也語曰變古易常不亂則亡此之謂乎

晉惠帝太安中周玘於陽羨起宅始成而邊戶有聲如人歎咤者玘亡後家誅滅此近言不從也

晉元帝太興四年吳郡民訛言有大蟲在紵中及樗樹上嚙人卽死晉陵民又言曰見一老女子居市被髮從肆人乞飲自言天帝令我從水門出而我誤由蟲門若還天帝必殺我如何於是百姓共相恐動云死者已十數也西及京都諸家有樗紵者伐去之無幾自止

晉元帝永昌元年寧州刺史王遜遣子澄入質將渝濮雜夷數百入京邑民忽訛言寧州人大食人家小兒親有見其蒸餗滿金甌中者又云失兒皆有主名婦人尋道拊心而哭於是百姓各禁錄小兒不得出門尋又言已得食人之主官當大航頭大杖考竟而

日有四五百人晨聚航頭以待觀行刑朝廷之士相問者皆曰信然或言郡縣文書已上王澄大懼檢測之事了無形民家亦未嘗有失小兒者然後知其訛言也此二事于寶云未之能論

永昌二年大將軍王敦下據姑熟百姓訛言行蟲病食人大孔數日入腹入腹則死治之有方當得白犬膽以爲藥自淮泗遂及京都數日之間百姓驚擾人人皆自云已得蟲病又云始在外時當燒鐵以灼之於是翕然被燒灼者十七八矣而白犬暴貴至相請奪其價十倍或有自云能行燒鐵者賃灼百姓日得五六萬億而後已四五日漸靜說曰夫裸蟲人類而人爲之主今云蟲食人言本同臭類而相殘賊也自下而上明其逆也必入腹者言害由中不由外也犬有守禦之性白者金色而膽用武之主也帝王之運五霸會於戊戌主用兵金者晉行火燒鐵以治疾者言必去其類

而來火與金合德共治蟲害也案中興之際大將軍本以腹心受伊呂之任而元帝末年遂攻京邑明帝諒闇又有異謀是以下逆上腹心內爛也及錢鳳沈充等逆兵四合而爲王師所挫踰月而不能濟北中郎將劉遐及淮陵內史蘇峻率淮泗之衆以救朝廷故其謠言首作於淮泗也朝廷卒以弱制強罪人授首是用白犬膽可救之效也

晉海西時庾晞四五年中喜爲挽歌自播大鈴爲唱使左右齊和又燕會輒令倡妓作新安人歌儻離別之辭其聲悲切時人怪之後亦果敗

晉海西公太和以來大家婦女緩鬢傾髻以爲盛飾用髮旣多不恒戴乃先作假髻施於水上呼曰假頭人欲借名曰借頭遂布天下自此以來人士多離事故或亡失頭首或以草木爲之假頭之

言此其先兆也

晉孝武泰元中立內殿名曰清暑少時而崩時人曰清暑者反言楚聲也果有哀楚之聲有人曰非此之謂豈可極言乎讖云代晉者楚其在茲乎及桓玄篡逆自號曰楚

泰元中小兒以兩鐵相打於土中名曰鬪族後王國寶王孝伯一姓之中自相攻擊也

桓玄出鎮南州立齋名曰蟠龍後劉毅居此齋蟠龍毅小字也

桓玄初改年爲大亨遐邇謹言曰二月了故義謀以仲春發也玄篡立又改年爲建始以與趙王倫同又易爲永始永始復是王莽受封之年也始徙司馬道子于安成晉主遜位出永安宮封晉主爲平固王琅邪王德文爲石陽公並使住尋陽城識者皆以爲言不從之妖也厥咎僭晉興何曾薄太官御膳自取私食子劭又過

之而王愷又過劭王愷羊琇之疇益致聲色窮珍極麗至元康中夸恣成俗轉相高尚石崇之侈遂兼王何而儷人主矣崇旣誅死天下尋亦淪喪僭踰之咎也

恒暘

魏明帝太初二年五月大旱元年以來崇廣官府之應也又是春晉宣帝南禽孟達置二郡張郃西破諸葛亮斃馬謖亢陽自大又其應也京房易傳曰欲德不用茲謂張厥災荒其旱陰雲不雨變而赤烟四際衆出過時茲謂廣其旱不生上下皆蔽茲謂隔其旱天赤三月時有電殺飛禽上緣求妃茲謂僭其旱三月大温亡雲君高臺府茲謂犯陰侵陽其旱萬物根死數有火災庶位踰節茲謂僭其旱澤物枯爲火所傷

太和五年三月自去冬十月至此月不雨辛巳大雩是春諸葛亮

寇天水晉宣王距郤之亢陽動衆又是時三隅分據衆出多過時也春秋說曰傷二穀謂之不雨

魏齊王正始元年二月自去冬十二月至此月不雨去歲正月明帝崩二月曹爽白嗣主轉晉宣王爲太傅外示尊崇內實欲令事先由已是時宣王功蓋魏朝欲德不用之應也

魏高貴鄉公甘露三年正月自去秋至此月旱時晉文王圍諸葛誕衆出過時之應也初壽春秋夏常雨潦常淹城而此旱踰年城陷乃大雨咸以爲天亡

吳孫亮五鳳二年大旱民饑是歲閏月魏將文欽以淮南衆數萬口來奔孫峻又破魏將曹珍于高亭三月朱異襲安豐不克七月城廣陵東海一郡十二月以馮朝爲監軍使者督徐州諸軍軍士怨叛此亢陽自大勞民失衆之罰也其後彌歲故旱亦竟年

吳孫皓寶鼎元年春夏旱是時皓遷都武昌勞民動衆之應也

晉武帝太始七年五月閏月旱大雩是春孫皓出華里大司馬望帥衆次于淮北四月北地胡寇金城西平涼州刺史牽弘出戰敗沒

太始八年五月旱是時帝納荀勗邪說留賈充不復西鎮而任愷稍疏上下皆蔽之應也又年熹魯芝李胤等並在散職近欲德不用之謂也

太始九年自正月旱至于六月祈宗廟社稷山川癸未雨去九月吳西陵督步闡據城來降遣羊祐統揚肇等衆八萬救迎闡十二月陸抗大破肇軍攻闡滅之

太始十年四月旱去年秋冬采擇卿校諸葛沖等女是春五十餘人入殿簡選又取小將吏女數十人母子號哭於宮中聲聞于外

行人悲酸是殆積陰生陽之應也

晉武帝咸寧二年五月旱大雩及社稷山川至六月乃澍雨

晉武帝太康二年自去冬旱至此春平吳亢陽動衆自大之應也
太康三年四月旱乙酉詔司空齊王攸與尚書廷尉河南尹錄訊
繫囚事從蠲宥

太康五年六月旱此年正月天陰解而復合劉毅上疏曰必有阿
黨之臣奸以事君者當誅而不赦也帝不答是時荀勗馮統僭作
威福亂朝尤甚

太康六年三月清涼幽冀郡國旱

太康六年六月齊陰武陵旱傷麥

太康七年夏郡國十三旱

太康八年四月冀州旱

太康九年夏郡國三十三旱

太康九年六月扶風始平京兆安定旱傷麥

太康十年二月旱

晉武帝太熙元年二月旱自太康以後雖正人滿朝不被親仗而
賈充荀勗楊駿馮統等迭居要重所以無年不旱者欲德不用上
下皆蔽庶位踰節之罰也

晉惠帝元康元年七月雒州大旱殞霜疾疫關中饑米斛萬錢

元康七年七月秦隄二州大旱故其年氐羌反叛雍州刺史解系
敗績是年正月周處盧播等復敗關西震亂交兵彌歲至是饑疫
薦臻戎晉並困朝廷不能振詔聽相賣鬻

元康七年九月郡國五旱

晉惠帝永寧元年自夏及秋青徐幽并四州旱是年春三王討趙

王倫六旬之中大小數十戰死者十餘萬人十二月郡國十二又旱

晉懷帝永嘉三年五月大旱襄平縣梁水淡涸竭河洛江漢皆可涉是年三月司馬越歸京都遣兵入宮收中書令繆播等九人殺之此僭踰之罰也又四方諸侯多懷無君之心劉淵石勒王彌李雄之徒賊害民命流血成泥又其應也

永嘉五年自去冬旱至此春去歲十二月司馬越棄京都以大眾南出多將王公朝士及以行臺自隨斥黜禁衛代以國人宮省蕭然無復君臣之節矣

晉陽秋云愍帝在西京旱傷薦臻無注記年月也

晉愍帝建武元年六月揚州旱去年十二月淳于伯寃死其年即旱而太興元年六月又旱于寶曰殺伯之後旱三年是也案前漢殺孝婦則旱後漢有囚亦旱見謝見理並獲雨澍此其類也班固曰刑罰妄加羣陰不附則陽氣勝故其罰恒陽

建武元年四月趙允等悉眾禦寇五月祖逖攻譙其冬周訪討杜曾又眾出之應也

晉元帝太興四年五月旱是時王敦彊僭之釁漸著又去歲蔡豹祖逖等並有征役

晉元帝永昌元年大旱是年三月王敦有石頭之變二宮陵辱大臣誅死僭踰無上故旱尤甚也

永昌元年閏十一月京都大旱川谷並竭

晉明帝太寧三年自春不雨至於六月去年秋滅王敦亢陽動眾自大之應也

晉成帝咸和元年秋旱是時庾太后臨朝稱制羣臣奏事稱皇太

后陛下此婦人專王事言不從而僭踰之罰也與漢鄧太后同事
咸和二年夏旱

咸和五年五月旱去年殄蘇峻之黨此春又討郭默滅之亢陽動
衆之應也

咸和六年四月旱去年八月石勒遣郭敬寇襄陽南中郎將周撫
奔武昌十月李雄使李壽寇建平太守楊謙奔宜都此正月
劉徵略婁縣於是起衆警備

咸和八年七月旱

咸和九年自四月不雨至于八月

晉成帝咸康元年六月旱是時成帝沖弱不親萬機內外之政委
之將相此僭踰之罰故連歲旱也至四年王導固讓太傅復子明
辟是後不早殆其應也時天下普旱會稽餘姚特甚米直五百民

有相繫

咸康二年三月旱

咸康三年六月旱

晉康帝建元元年五月旱是時宰相專政方伯擅重兵又與咸康
初同事也

晉穆帝永和元年五月旱有司奏依董仲舒術徙市開水門遣謁
者祭太社是時帝在緇抱褚太后臨朝如明穆太后故事

永和五年七月不雨至于十月是年二月征北將軍褚裒遣軍伐
沛納其民以歸六月又遣西中郎將陳達進據壽陽自以舟師二
萬至于下邳喪其前驅而還達亦退

永和六年閏月旱是春桓溫以大衆出夏口上疏欲以舟軍北伐
朝廷駐之蕭敬盜涪西蠻校尉采壽敗績

晉穆帝升平三年十二月大旱此冬十月北中郎將郗曇帥萬餘人出高平經略河竟又遣將軍諸葛悠以舟軍入河敗績西中郎將謝萬次下蔡衆潰而歸

升平四年十二月大旱

晉哀帝隆和元年夏旱是時桓溫強恣權制朝廷僭踰之罰也又去年慕容恪圍冀州刺史呂護桓溫出次宛陵范汪袁真並北伐衆出過時也

晉海西太和四年十二月涼州春旱至夏

晉簡文帝咸安二年十月大旱民饑是時嗣主幼沖桓溫陵僭

晉孝武帝寧康元年二月旱是時桓溫入覲高平陵闔朝致拜踰僭之應也

寧康三年冬旱先是氏賊破梁益州刺史楊亮周仲孫奔退明年

威遠將軍桓石虔擊姚長墊江破之退至五城益州刺史竺瑶帥衆戍巴東

晉孝武帝太元四年六月大旱去歲氏賊圍南中郎將朱序於襄陽又圍揚威將軍戴道於彭城桓嗣以江州之衆次郡援序北府發三州民配何謙救道是春襄陽順陽魏興城皆沒賊遂略淮南向廣陵征虜將軍謝石率水軍次涂中兗州刺史謝玄督諸將破之

太元八年六月旱夏初桓沖征襄陽遣冠軍將軍桓石虔進據樊城朝廷又遣宣城内史胡彬次峽石爲沖聲勢也

太元十年七月旱饑初八年破符堅九年諸將略地有事徐豫楊亮趙統攻討巴沔是年正月謝安又出鎮廣陵使子琰進次彭城太元十三年六月旱去歲北府遣戍胡陸荊州經略河南是年郭

銓置戍野王又遣軍破黃淮

太元十五年七月旱是春丁零略兗豫鮮卑寇河上朱序桓不才等北至太行東至滑臺踰時攻討又戍石門

太元十七年秋旱至冬是時茹千秋爲驃騎咨議竊弄主相威福又丘尼乳母親黨及婢僕之子階緣近習臨民領衆又在所多上春竟囚不以其辜建康獄吏枉暴尤甚此僭踰不從寬濫之罰也晉安帝隆安四年五月旱去冬桓玄追殺殷仲堪而朝廷卽授以荊州之任司馬元顯又諷百僚悉使敬已此皆陵僭之罰也

隆安五年夏秋大旱十二月不雨去年夏孫恩入會稽殺內史謝琰此年夏略吳又殺內史袁山松軍旅東討衆出過時

晉安帝元興元年七月大饑九月十月不雨是年正月司馬元顯以大衆將討桓玄旣而玄至殺元顯五月又遣東征孫恩餘黨十

月北討劉軌

元興二年六月不雨冬又旱是時桓玄奢僭十二月遂篡位

元興三年八月不雨是時王旅四伐西夏未平

晉安帝義熙六年九月不雨是時王師北討廣固疆理三州

義熙八年十月不雨是秋王師西討劉毅分遣伐蜀

義熙十年九月旱十二月又旱并瀆多竭

宋文帝元嘉二年夏旱

元嘉四年秋京都旱

元嘉八年五月揚州諸郡旱

元嘉十九年二十年南兗豫州旱

元嘉二十七年八月不雨至二十八年三月時索虜南寇

孝武帝大明七年八年東諸郡大旱民饑死者十六七先是江左

以來制度多闕孝武帝立明堂造五輅是時大發徒衆南巡校獵
盛自矜大故致旱災

後廢帝元徽元年八月京都旱

詩妖

魏明帝太和中京師歌甦鈴曹子其唱曰其奈汝曹何此詩妖也
其後曹爽見誅曹氏遂廢

魏明帝景初中童謠曰阿公阿公駕馬車不意阿公東渡河阿公
東還當奈何及宣王平遼東歸至白屋當還鎮長安會帝疾篤急
召之乃乘追鋒車東渡河終翦魏室如童謠之言也

魏齊王嘉平中有謠曰白馬素羈西南馳其誰乘者朱虎騎朱虎
者楚王彪小字也王凌令狐愚聞此謠謀立彪事發凌等伏誅彪
賜死

吳孫亮初童謠曰吁汝恪何若若蘆葦單衣篋鈎絡於何相求楊
子閣楊子閣者反語石子堀也鈎落鈎帶也及諸葛恪死果以葦
席裹身篋束其要投之石子堀後聽恪故吏收斂求之此堀云
孫亮初公安有白鼉鳴童謠曰白鼉鳴龜背平南郡城中可長生
守死不去義無成南郡城可長生者有急易以逃也明年諸葛恪
敗弟融鎮公安亦見襲融刮金印龜服之而死鼉有鱗介甲兵之
象又白兵祥也

孫休永安二年將守質子羣聚嬉戲有異小子忽來言曰三公鋤
司馬如又曰我非人熒惑星也言畢上升仰視苦叟一匹練有頃
沒于竇曰後四年而蜀亡六年而魏廢二十一年而吳平於是九
服歸晉魏與吳蜀並爲戰國三公鋤司馬如之謂也

孫皓初童謠曰寧飲建業水不食武昌魚寧還建業死不止武昌

居皓尋遷都武昌民泝流供給咸怨毒焉

孫皓遣使者祭石印山下妖祠使者因以丹書嚴曰楚九州渚吳九州都揚州士作天子四世治太平矣皓聞之意益張曰從大皇帝至朕四世太平之主非朕復誰恣虐踰甚尋以降亡近詩妖也孫皓天紀中童謠曰阿童復阿童銜刀游渡江不畏岸上虎但畏水中龍晉武帝聞之加王濬龍驤將軍及征吳江西衆無過者而王濬先定秣陵

晉武帝太康後江南童謠曰局縮肉數橫目中國當敗吳當復又曰宮門柱且莫朽吳當復在三十年後又曰雞鳴不拊翼吳復不用力于時吳人皆謂在孫氏子孫故竊發亂者相繼按橫目者四字自吳亡至晉元帝興幾四十年皆如童謠之言元帝懦而少斷局縮肉直斥之也干寶云不知所斥諱之也

太康末京洛始爲折楊柳之歌其曲始有兵革苦辛之詞終以禽獲斬截之事是時三楊貴盛而族滅太后廢黜而幽死

晉惠帝永熙中河內溫縣有人如狂造書曰光光文長大戟爲牆毒藥雖行戟還自傷又曰兩火沒地哀哉秋蘭歸形街郵路人爲歎及楊駿居內府以戟爲衛死時又爲戟所害楊太后被廢賈后絕其膳八日而崩葬街郵亭北百姓哀之兩火武帝諱蘭楊后字也

永熙中童謠曰二月末三月初荆筆楊版行詔書宮中大馬幾作驢楊駿初專權楚王尋用事故言荆筆楊版也二人不誅則君臣禮悖故云幾作驢

晉惠帝元康中京洛童謠曰南風起吹白沙遙望魯國何嗟哉千歲髑髏生齒牙又曰城東馬子莫嚙啣比至三月纏汝髮南風賈

后字也白晉行也沙門太子小名也魯賈謚國也言賈后將與謚
爲亂以危太子而趙王因釁咀嚼豪賢以成篡奪也是時愍懷頗
失衆望卒以廢黜不得其死

元康中天下尙農通著大鄣日童謠曰屠蘇鄣日覆兩耳當見瞎
兒作天子及趙王篡位其目實眇焉趙王倫旣篡洛中童謠曰虎
從北來鼻頭汗龍從南來登城看水從西來何灌灌數月而齊王
成都河間義兵同會誅倫按成都西蕃而在鄴故曰虎從北來齊
東蕃而在許故曰龍從南來河間水區而在關中故曰水從西來
齊留輔政居宮西有無君之心故言登城看也

晉惠帝太安中童謠曰五馬游度江一馬化爲龍後中原大亂宗
蕃多絕唯琅邪汝南西陽南頓彭城同至江表而元帝嗣晉矣
司馬越還洛有童謠曰洛中大鼠長尺二若不蚤去大狗至及苟

希將破汲桑又謠曰元超兄弟大落度上桑打樵爲苟作由是越
惡希奪其兗州隙難遂構

晉愍帝建興中江南歌謠曰旬如白阮破合集持作甌揚州破換
敗吳興覆甌甄按白者晉行阮器有口屬瓮瓦質剛亦金之類也
旬如白阮破者言二都傾覆王室大壞也合集持作甌者言元皇
帝鳩集遺餘以主社稷未能克復中原偏王江南故其喻小也及
石頭之事六軍大潰兵人抄掠京邑爰及二宮其後三年錢鳳復
攻京邑阻水而守相持月餘日焚燒城邑并埋木刊矣鳳等敗退
沈充將其黨還吳興官軍踵之蹈籍郡縣充父子授首黨與誅者
以百數所謂揚州破換敗吳興覆甌甄甄瓦器又小於甌也
晉明帝太寧初童謠歌曰側力側力放馬山側大馬死小馬餓高
山崩石自破及明帝崩成帝幼爲蘇峻所逼遷于石頭御膳不足

高山崩言峻尋死石峻弟蘇石也峻死後石據石頭尋為諸公所破也

晉成帝之末民間謠曰磕磕何隆隆駕車入梓宮少日而宮車晏駕

晉成帝咸康二年十二月河北謠語曰麥入土殺石虎後如謠言庾亮初出鎮武昌出石頭百姓於岸上歌曰庾公上武昌翩翩如飛鳥庾公還揚州白馬牽流蘇後連徵不入及薨還都塋公還揚州白馬牽流蘇後連徵不入及薨還都塋

庾義在吳郡吳中童謠曰寧食下湖荇不食上湖蓴庾吳沒命喪復殺王領軍無幾而庾義王洽相繼亡

晉穆帝升平中童子輩忽歌於道曰阿子聞曲終輒云阿子汝聞不無幾而穆帝崩太后哭曰阿子汝聞不

升平末民間忽作廉歌有扈謙者聞之曰廉
宮廷廉內外悉臨國家其大諱乎少時

歌云白門廉

晉哀帝隆和初童兒歌曰升平不滿斗隆和那得久桓公入石頭陛下徒跣走帝聞而惡之復改年曰興寧民復歌曰雖復改興寧亦復無聊生哀帝尋崩升平五年穆帝崩不滿斗不至十年也

晉海西公太和中民歌曰青青御路楊白馬紫游韉汝非皇太子那得甘露漿白者金行馬者國族紫為奪正之色明以紫間朱也海西公尋廢三子非海西子並死縊以馬韉死之明日南方獻甘露

太和末童謠云犁牛耕御路白門種小麥及海西被廢處吳民犁耕其門前以種小麥如謠言

晉海西公生皇子百姓歌云鳳凰生一雛天下莫不喜本言是馬

駒今定成龍子其歌甚美其旨甚微海西公不男使左右向龍與
內侍妾生子以爲己子

桓石民爲荊州鎮上明民忽歌曰黃曇子曲終又曰黃曇英揚州
大佛來上明頃之而石民死王忱爲荊州黃曇子乃是王忱之字
也忱小字佛大是大佛來上明也

太元末京口謠曰黃雌雞莫作雄父啼一旦去毛衣衣被拉颯捫
尋王恭起兵誅王國寶旋爲劉牢之所敗也

司馬道子於東府造土山名曰靈秀山無幾而孫恩作亂再踐會
稽會稽道子所封靈秀恩之字也

庾楷鎮歷陽民歌曰重羅犁重羅犁使君南上無還時後楷南奔
桓玄爲玄所誅

殷仲堪在荊州童謠曰芒籠目繩腹殷當敗恒當復無幾而仲

堪敗桓玄有荊州

王恭鎮京口舉兵誅王國寶百姓謠云昔年食白飯今年食麥麩
天公誅謫汝教汝捻龍喉龍喉喝復喝京口敗復敗昔年食白飯
言得志也今年食麥麩麩麩穢其精已去明將敗也天公將加譴
謫而誅之也捻龍喉氣不通死之祥也敗復敗丁寧之辭也恭尋
死京都大行咳疾而喉並喝焉

王恭在京口民間忽云黃頭小人欲作賊阿公在城下指縛得又
云黃頭小人欲作亂賴得金刀作蕃扞黃字上恭字頭也小人恭
字下也尋如謠者言焉

晉安帝隆安中民忽作懊惱歌其曲中有草生可掣結女兒可掣
抱之言桓玄旣篡居天位義旗以三月二日掃定京都玄之宮女
及逆黨之家子女伎妾悉爲軍賞東及甌越北流淮泗皆人有所

獲焉時則草可結事則女可抱信矣

桓玄既篡童謠曰草生及馬腹烏啄桓玄目及玄敗走至江陵五月中誅如其期焉桓玄時民謠語云征鐘落地桓迸走征鐘至穢之服桓四體之下稱玄自下居上猶征鐘之厠歌謠下體之詠民口也而云落地墜地之祥迸走之言其驗明矣

司馬元顯時民謠詩云當有十一口當為兵所傷木且當北度走入浩浩鄉又云金刀既以刻媿媿金城中此詩云襄陽道人竺曇林所作多所道行於世孟顛釋之曰十一口者玄字象也木且桓也桓氏當悉走入關洛故云浩浩鄉也金刀劉也倡義諸公皆多姓劉媿媿美盛貌也

桓玄得志童謠曰長干巷巷長干今年殺郎君明年斬諸桓及玄走而諸桓悉誅焉郎君司馬元顯也

晉安帝義熙初童謠曰官家養蘆化成荻蘆生不止自成積其時官養蘆龍寵以金紫奉以名州養之已極而不能懷我好音舉兵內伐遂成讎敵也蘆生不止自成積及蘆龍作亂時人追思童謠惡其有成積之言識者曰芟夷蘊崇之又行火焉是艸之窮也伐斫以成積又以為薪亦蘆荻之終也其盛既極亦將芟夷而為積焉龍既窮其兵勢盛其舟艦卒以滅亡僵屍如積焉

盧龍據有廣州民間謠云蘆生漫漫竟天半後擁有上流數州之地內逼京輦應天半之言

義熙三年中小兒相逢於道輒舉其兩手曰盧健健次曰鬪歎鬪歎末復曰翁年老翁年老當時莫知所謂其後盧龍內逼舟艦蓋川健健之謂也既至查浦屢剋期欲與官鬪鬪歎之應也昔温嶠令郭景純卜已與庾亮吉凶景純云元吉嶠語亮景純每筮當是

不敢盡言吾等與國家同安危而曰元吉事有成也於是協同討滅王敦翁年老羣公有期願之慶知妖逆之徒自然消殄也其時復有謠言曰盧橙橙逐水流東風忽如起那得入石頭盧龍果敗不得入石頭

符堅中童謠曰阿堅連牽三十年後若欲敗時當在江湖邊後堅敗於淝水在偽位凡三十年

符堅中謠語云河水清復清符堅死新城堅為姚萇所殺死於新城

符堅中歌云魚羊田斗當滅秦魚羊鮮也田斗卑也堅自號秦言滅之者鮮卑也其羣臣諫堅令盡誅鮮卑堅不從及淮南敗還為慕容冲所攻亡奔姚萇身死國滅

毛蟲之孽

晉武帝太康六年南陽送兩足虎此毛蟲之孽也識者為其文曰武形有虧金虎失儀聖主應天斯異何為言兆亂也京房易傳曰足少者下不勝狂也于寶曰虎者陰精而居于陽金獸也南陽火名也金精入火而失其形王室亂之妖也六水數言水數既極火慝得作而金受其敗也至元康九年始殺太子距此十四年二七十四火始終相乘之數也自帝受命至愍懷之廢凡三十五年太康九年荊州獻兩足獲

太康七年十一月丙辰四角獸見于河間河間王顥獲以獻角兵象也董仲舒以四角為四方之象後河間王數連四方之兵作為亂階殆其應也

晉懷帝永嘉三年偃鼠出延陵此毛蟲之孽也郭景純筮之曰此郡東之縣當有妖人欲稱制者亦尋自死矣其後吳興徐馥作亂

殺太守袁瓌亦時滅是其應也

晉成帝咸和六年正月丁巳會州郡秀孝於樂賢堂有磨見於前獲之孫盛曰夫秀孝天下之彥士樂賢堂所以樂養賢也晉自喪亂以後風教凌夷秀無策試之才孝之四行之實磨興於前或斯故乎

晉哀帝隆和元年十月甲申有塵入東海第百姓謹言曰主入東海第識者怪之及海西廢爲東海王先送此第

晉孝武太元十三年四月癸巳祠祠畢有兔行廟堂上兔野物也而集宗廟之堂不祥莫甚焉

宋文帝元嘉二十四年二月雍州送六足麋刺史武陵王表爲祥瑞此毛蟲之孽

宋順帝昇明元年象三頭度蔡洲暴稻穀及園野

犬禍

公孫淵家有犬冠幘絳衣上屋此犬禍也屋上亢陽高危之地天戒若曰淵亢陽無上偷自尊高狗而冠者也及自立爲燕王果爲魏所滅京房易傳曰君不正臣欲篡厥妖狗出朝門

魏侍中應璩在直廬欵見一白狗問衆人無見者踰年卒近犬禍也

諸葛恪征淮南歸將朝會犬銜引其衣恪曰犬不欲我行乎還坐有頃復起犬又銜衣乃令逐犬遂升車入而被害

晉武帝太康九年幽州有犬鼻行地三百餘步

晉惠帝元康中吳郡婁縣民家聞地中有大聲掘視得雌雄各一還置窟中覆以磨石宿昔失所在元帝太興中吳郡府舍又得二物頭如此其後太守張茂爲吳興兵所殺案夏鼎志曰掘地得狗

名曰賈尸子曰地中有犬名曰地狼同實而異名也

晉惠帝永興元年丹陽內史朱達家犬生三子皆無頭後達爲揚州刺史曹武所殺

晉孝懷帝永嘉五年吳郡嘉興張林家狗人言云天下人餓死

晉安帝隆安初吳郡治下狗恒夜吠聚高橋上人家狗有限而犬聲甚衆或有夜出覘之者云一狗假有兩三頭皆前向亂吠無幾孫恩亂於吳會

桓玄將拜楚王已設拜席羣官陪位玄未及出有狗來便其席萬衆睚眦莫不驚怪玄性猜暴竟無言者逐狗改席而已

宋武帝永初二年京邑有狗人言

文帝元嘉二十九年吳興東遷孟慧度婢蠻與狗通好如夫妻彌年

孝武孝建初顏竣爲左衛於省內聞犬子聲在地中掘焉得烏犬子養久之後自死

明帝初晉安王子勛稱僞號於尋陽柴桑有狗與女人交三日不分離

明帝泰始中秣陵張僧護家犬生豕子

白青白祥

晉武帝太康十年洛陽宮西宜秋里石生地中始高三尺如香爐形後如偃人盤薄不可掘案劉向說此白青也明年宮車晏駕王宮始騷卒以亂亡京房易傳曰石立如人庶人爲天下雄此近之矣

晉成帝咸康初地生毛近白青也孫盛以爲民勞之異是後胡滅而中原向化將相皆甘心焉於是方鎮屢革邊戍仍遷皆攤帶部

曲動有萬數其間征伐徵賦役無寧歲天下擾動民以疲怨
咸康三年六月地生毛

晉孝武太元二年五月京都地生毛至四年而氏賊攻襄陽圍彭
城向廣陵征戍仍出兵連不解

太元十四年四月京都地生毛是時苻堅滅後經略多事
太元十七年四月地生毛

晉安帝隆安四年四月乙未地生毛或白或黑

晉安帝元興三年五月江陵地生毛是後江陵見襲交戰者數矣
晉安帝義熙三年三月地生白毛

義熙十年三月生白毛明年王旅西討司馬休之又明年北埽關
洛

魏明帝青龍三年正月乙亥隕石于壽光按左氏傳隕石星也

歆說曰庶民惟星隕於宋者象宋襄公將得諸侯而不終也秦始
皇時有隕石班固以爲石陰類又白祥臣將危君是後司馬氏得
政

晉武帝太康五年五月丁巳隕石于温及河陽各二

太康六年正月隕石于温三

晉成帝咸和八年五月星隕于肥鄉一

咸和九年正月隕石於涼州

吳孫亮五鳳二年五月陽羨縣離里山大石自立按京房易傳罔
庶士爲天子之祥也其說曰石立於山同姓平地異姓于寶以爲
孫皓承廢故之家得位其應也或曰孫休見立之祥也

晉惠帝元康五年十二月有石生于宜年里

晉惠帝永康元年襄陽郡上言得鳴石撞之聲聞七八里

晉惠帝太安元年丹陽姑孰縣夏架湖有大石浮二百步而登岸民驚譟相告曰石來于寶曰尋有石沐入建業

晉武帝太始八年五月蜀地雨白毛此白祥也是時益州刺史皇甫晏冒暑伐汶山胡從事何旅固諫不從牙門張弘等因眾之怨誣晏謀逆害之京房易傳曰前樂後憂厥妖天雨羽又曰邪人進賢人逃天雨毛其易妖曰天雨毛羽貴人出走三占皆應也

晉惠帝永寧元年齊王冏舉義軍軍中有小兒出於襄城繁昌縣年八歲髮體悉白頗能卜於洪範則白祥也

晉車騎大將軍東嬴王騰自并州遷鎮鄴行次真定時久積雪而當門前方數尺獨消釋騰怪而掘之得玉馬高尺許口齒缺騰以馬者國姓上送之以為瑞然論者皆云馬而無齒則不得食妖祥之兆衰亡之徵案占此白祥也是後騰為汲桑所殺而晉室遂亡

宋文帝元嘉中徐湛之為丹陽尹夜西門內有氣如練西南指長數十丈又白光覆屋良久而轉駛乃消此白祥也

前廢帝景和元年鄧琬在尋陽種紫花皆白白青也

木沴金

魏齊王正始末河南尹李勝治聽事有小材激墮槌受符石虎項斷之此木沴金也勝後旬日而敗

晉惠帝元康八年三月郊禘壇石中破為二此木沴金也郊禘壇者求子之神位無故而自毀太子將危之妖也明年愍懷廢死晉孝武帝太元十年四月謝安出鎮廣陵始發石頭金鼓無故自破此木沴金之異也天意若曰安徒揚經略之聲終無其實鉦鼓不用之象也八月以疾還是月薨

宋書卷三十二

志第二十二

五行三

五行傳曰棄法律逐功臣殺太子以妾為妻則火不炎上謂火失其性而為災也又曰視之不明是謂不哲厥咎舒厥罰恒燠厥極疾時則有草妖時則有羸蟲之孽時則有羊禍時則有目疴時則有赤青赤祥惟水沴火羸蟲劉歆傳以為羽蟲火不炎上

魏明帝太和五年五月清商殿災初帝為平原王納河南虞氏為妃及即位不以為后更立典虞車工卒毛嘉女是為悼皇后后本仄微非所宜升以妾為妻之罰也

魏明帝青龍元年九月洛陽宮鞠室災

魏書卷三十二
志第二十二

又行月

二年四月崇華殿災延于南閣繕復之至三年七月此殿又災帝問高堂隆此何咎也於禮寧有所禳之義乎對曰夫災變之發皆所以明教誡也唯率禮修德可以勝之易傳曰上不儉下不節孽火燒其室又曰君高其臺天火爲災此人君苟飾宮室不知百姓空竭故天應之以旱火從高殿起也案舊占災火之發皆以臺榭宮室爲誡今宜罷散民役務從節約清掃所災之處不敢於此有所營造葺葺嘉禾必生此地以報陛下虔恭之德不從遂復崇華殿改曰九龍以郡國前後言龍見者九故以爲名多棄法度疲民逞欲以妾爲妻之應也

吳孫亮建興元年十二月武昌端門災改作端門又災內殿案春秋魯雉門及兩觀災董仲舒以爲天意欲使定公誅季氏若曰去其高顯而奢僭者也漢武帝世遼東高廟災其說又同今此與二事頗類也且門者號令所出殿者聽政之所是時諸葛恪秉政而矜慢放肆孫峻總禁旅而險害終著武昌孫氏尊號所始天戒若曰宜除其貴要之首者恪果喪衆殄民峻授政於綝綝廢亮也或曰孫權毀徹武昌以增太初宮諸葛恪有遷都意更起門殿事非時宜故見災也京房易傳曰君不思道厥妖火烧宮

吳孫亮太平元年二月朔建業火人火之也是秋孫綝始秉政矯以亮詔殺呂據滕胤明年又輒殺朱異棄法律逐功臣之罰也吳孫休永安五年二月白虎門北樓災六年十月石頭小城火烧西南百八十丈是時嬖人張布專擅國勢多行無禮而韋昭盛冲終斥不用兼遣蔡戰等爲使驚擾州郡致使交趾反亂是其咎也吳孫皓建衡二年三月大火燒萬餘家死者七百人案春秋齊火劉向以爲桓公好內聽女口妻妾數更之罰也皓制令詭暴蕩棄

法度勞臣名士誅斥甚衆後宮萬餘女謁數行其終隆寵佩皇后
璽者又多矣故有大火

晉武帝太康八年三月乙丑震災西閣楚王所止坊及臨商觀牕
十年四月癸丑崇賢殿災十月庚辰含章鞠室修成堂前廡內坊
東屋輝章殿南閣火時有上書者曰漢王氏五侯兄弟迭任今楊
氏三公並在大位天變屢見竊爲陛下憂之楊珧由是乞退是時
帝納馮統之間廢張華之功聽楊駿之讒離衛瓘之寵此逐功臣
之罰也明年宮車晏駕其後楚王承竊發之旨戮害二公身亦不
免震災其坊又大意乎

晉惠帝元康五年閏月庚寅武庫火張華疑有亂先固守然後救
災是以累代異寶王莽頭孔子履漢高斷白蛇劍及二百萬人器
械一時蕩盡是後愍懷見殺殺太子之罰也天戒若曰夫設險擊
柝所以固其國儲積戎器所以戒不虞今冢嗣將傾社稷將泯禁
兵無所復施皇旅又將誰衛帝后不悟終喪四海是其應也張華
閹篡皆曰武庫火而氏羌反太子見廢則四海可知矣

元康八年十一月高原陵火是時賈后凶恣賈謐擅朝惡積臯稔
宜見誅絕天戒若曰臣妾之不可者雖親貴莫比猶宜忍而誅之
如吾燔高原陵也帝旣眊弱而張華又不納裴頠劉卞之謀故后
遂與謐誣殺太子也于寶云高原陵火太子廢其應也漢武帝世
高園便殿火董仲舒對與此占同

晉惠帝永康元年帝納皇后羊氏后將入宮衣中忽有火衆咸怪
之太安二年后父玄之以成都之逼憂死永興元年成都遂廢后
處之金墉城而殺其叔父同之是後還立立而復廢者四又詔賜
死荀藩表全之雖末還在位然憂逼折辱終古未聞此孽火之應

晉惠帝永興二年七月甲午尚書諸曹火延崇禮闈及閣道夫百揆王化之本王者棄法律之應也清河王覃入爲晉嗣不終于位又殺太子之罰也

晉孝懷帝永嘉四年十一月襄陽火死者三千餘人是時王如自號大將軍司離二州牧衆四五萬攻略郡縣以爲已邑都督力屈嬰城自守賊遂攻逼襄陽此下陵上陽失節火災出也

晉元帝太興中王敦鎮武昌武昌火起興衆救之救於此而發於彼東西南北數十處俱應數日不絕班固所謂濫炎妄起雖興師不能救之之謂也于寶曰此臣而君行亢陽失節之災也

晉元帝永昌二年正月癸巳京都大火三月饒安東光安陵三縣火燒七千餘家死者萬五千人

晉明帝大寧元年正月京都火是時王敦威侮朝廷多行無禮內外臣下咸懷怨毒極陰生陽故有火災與董仲舒說春秋陳火同事也

晉穆帝永和五年六月震災石虎太武殿及兩廂端門光爛照天金石皆盡火月餘乃滅是年四月石虎死矣其後胡遂滅亡

晉海西太和中和郗愔爲會稽六月大旱災火燒數千家延及山陰倉米數百萬斛炎烟蔽天不可撲滅

晉孝武帝寧康元年三月京都風火大起是時桓温入朝志在陵上少主踐位人懷憂恐此與大寧火同事

晉孝武帝太元十年正月立國子學學生多頑囂因風放火焚房百餘間是後考課不厲賞黜無章有育才之名無收賢之實書云知人則哲此不哲之罰先兆也

太元十三年十二月乙未延賢堂災丙申螽斯則百堂及客館驛

騎廬皆災於時朝多弊政衰陵日兆不哲之罰皆有象類主相不悟終至亂亡云

晉安帝隆安二年三月龍舟二乘災是水沴火也

晉安帝元興元年八月庚子尚書下舍曹火

元興三年盧循攻略廣州刺史吳隱之閉城固守是年十月壬戌夜大火起時民人避寇盈滿城內隱之懼有應賊徂務嚴兵不先救火由是府舍焚燒蕩盡死者萬餘人因遂散潰悉爲賊擒殆與襄陽火同占也

晉安帝義熙四年七月丁酉尚書殿中吏部曹火

義熙十一年京都所在大行火災吳界尤甚火防甚峻猶自不絕王弘時爲吳郡白日在廳事上見天上有一赤物下狀如信幡徑集路南人家屋上火卽復大發弘知天爲之災不罪火主

宋文帝元嘉五年正月戊子京邑大火

元嘉七年十二月乙亥京邑火廷燒大社北墻

元嘉二十九年三月壬午京邑大火風雷甚壯

後廢帝元徽三年正月己巳京邑大火

元徽三年三月戊辰京邑大火火燒二岸數千家

恒燠

庶徵之恒燠劉向班固以冬亡冰及霜不殺草應之京房易專又曰夏則暑殺人冬則物華實

吳孫亮建興元年九月桃李華孫權世政煩賦重民彫於役是時諸葛恪始輔政息校官原逋責除關梁崇寬厚此舒緩之應也一說桃李寒華爲草妖或屬華孽

魏少帝景元三年十月桃李華自高貴弒死之後晉文王深樹恩

德事崇優緩此其應也

晉穆帝永和九年十二月桃李華是時簡文輔政事多弛略舒緩之應也

宋順帝昇明元年十月於潛桃李榛結實

草妖

漢獻帝建安二十五年春正月魏武帝在洛陽將起建始殿伐濯龍樹而血出又掘徙梨根傷亦血出帝惡之遂寢疾是月崩蓋草妖又赤祥也是歲魏文帝黃初元年也

吳孫亮五鳳元年六月交趾稗草化爲稻昔三苗將亡五穀變種此草妖也其後亮廢

蜀劉禪景耀五年宮中大樹無故自折譙周憂之無所與之言乃書柱曰衆而大其之會具而授若何復言曹者衆也魏者大也衆

而大天下其當會也具而授如何復有立者乎蜀果亡如周言此草妖

吳孫皓天璽元年吳郡臨平湖自漢末穢塞是時一夕忽開除無草長老相傳此湖塞天下亂此湖開天下平吳尋亡而九服爲一吳孫皓天紀三年八月建業有鬼目菜生于黃狗家依緣棗樹長丈餘莖廣四尺厚二分又有蕒菜生于吳平家高四尺如枇杷形上圓徑一尺八寸莖廣五寸兩邊生葉綠色東觀案圖名鬼目作芝草蕒菜作平慮遂以狗爲侍芝郎平爲平慮郎皆銀印青綬于寶曰明年晉平吳王濬止船正得平渚姓名顯然指事之微也黃狗者吳以土運承漢故初有黃龍之瑞及其季年而有鬼目之妖託黃狗之家黃稱不改而貴賤大殊天道精微之應也

晉惠帝元康二年春巴西郡界竹生花紫色結實如麥外皮青中

赤白味甘

元康九年六月庚子有桑生東宮西廂日長尺餘甲辰枯死此與殷太戊同妖太子不能悟故至廢戮也班固稱野木生朝而暴長小人將暴居大臣之位危亡國家之象朝將爲墟也是後孫秀張林尋用事遂至大亂

晉惠帝永康元年四月丁巳立皇孫臧爲皇太孫五月甲子就東宮桑又生於西廂明年趙倫篡位鳩殺臧此與愍懷同妖也

永康元年四月壯武國有桑化爲栢是月張華遇害

晉孝懷帝永嘉三年冬項縣桑樹有聲如解材民謂之桑林哭案劉向說桑者喪也又爲哭聲不祥之甚是時京師虛弱胡寇交通司馬越無衛上國之心四年冬委而南出至五年春薨于此城石勒邀其衆圍而射之王公以下至庶人死者十餘萬人又剖越棺

焚其尸是敗也中原無所請命洛京尋沒桑哭之應也

永嘉六年五月無錫縣有四株茱萸樹相膠而生狀若連理先是郭景純筮延陵偃鼠遇臨之益曰後當復有妖樹生若瑞而非辛螫之木也儻有此東南數百里必有作逆者其後徐馥作亂此草妖也郭以爲木不曲直

永嘉六年七月豫章郡有樟樹久枯是月忽更榮茂與昌邑枯社復生同占懷帝不終其祚元帝由支族興之應也

晉明帝太寧元年九月會稽剡縣木生如人面是後王敦稱兵作逆禍敗無成漢哀靈之世並有此妖而人貌備具故其禍亦大今此但人面而已故其變亦輕

晉成帝咸和六年五月癸亥曲阿有柳樹倒地六載是月忽復起生咸和九年五月甲戌吳雄家有死榆樹是日因風雨起生與漢

上林斷柳起生同象初康帝爲吳王于時雖改封琅邪而猶食吳郡爲邑是帝越正體饗國之象也曲阿先亦吳地象見吳邑雄合又天意也

晉哀帝興寧三年五月癸卯廬陵西昌縣修明家有死栗樹是日忽起生時孝武年四歲而簡文居蕃四海宅心及得位垂統則祚隆孝武識者竊曰西昌修明之祥帝諱實應之矣是與漢宣帝頗同象也

晉海西太和元年涼州楊樹生松天戒若曰松不改柯易葉楊者柔脆之木比承久之業將集危亡之地是後張天錫降氏

晉孝武太元十四年六月建寧銅樂縣枯木斷折忽然自立相屬京房易傳曰棄正作淫厥妖木斷自屬妃后有專木仆乃立是時治道方僻多失其正其後張夫人專寵及帝崩兆庶歸咎張氏焉

晉安帝元興三年荆江二界生竹實如麥

晉安帝義熙二年九月揚州營揚武將軍陳蓋家有苦蕒菜莖高四尺六寸廣三尺二寸此殆與吳終同象也

義熙中宮城上御道左右皆生蒺藜草妖也蒺藜有棘不可踐而行生牆及馳道天戒若曰人君拱嘿不能聽政雖居宸極猶若空宮雖有御道未嘗馳騁皆生蒺藜若空廢也

義熙八年太社生薰樹于壇側薰於文尚黑宋水德將王之符也羽蟲之孽

魏文帝黃初四年五月有鵜鶘鳥集靈芝池案劉向說此羽蟲之孽又青祥也詔曰此詩人所謂汗澤者也曹詩刺恭公遠君子近小人今豈有賢智之士處于下位否則斯鳥胡爲而至哉其博舉天下雋德茂才獨行君子以荅曹人之刺於是楊彪管寧之徒咸

見薦舉此謂覩妖知懼者也雖然不能優容亮直而多溺偏私矣
京房易傳曰辟退有德厥妖水鳥集于國井

黃初末宮中有鸞生鷹口爪俱赤此與商紂朱隱同象

景初元年又有鸞生鉅殼於衛國洧桃里李蓋家形若鷹吻似燕
案劉向說此羽蟲之孽又赤青也高堂隆曰此魏室之大異宜防
鷹揚之臣於蕭牆之內其後晉宣王起遂有魏室

漢獻帝建安二十三年禿鸞鳥集鄴宮文昌殿後池明年魏武王

薨

魏文帝黃初三年又集雒陽芳林園池七年又集其夏文帝崩景
初末又集芳林園池前世再至輒有大喪帝惡之其明年崩

蜀劉禪建興九年十月江陽至江州有鳥從江南飛渡江北不能
達墮水死者以千餘是時諸葛亮連年動衆志吞中夏而終死渭

南所圖不遂又諸將分爭頗喪徒旅鳥北飛不能達墮水死者皆
有其象也亮竟不能過渭又其應乎此與漢楚國烏鬪墮泗水猶
類矣

魏明帝青龍三年戴鸞巢鉅鹿人張琚博學有高節不應袁紹高
幹之命魏太祖辟亦不至優游嘉遁門徒數百太守王肅雅敬焉
時年百餘歲謂門人曰戴鸞陽鳥而巢于門陰此凶祥也乃援琴
歌詠作詩一首旬日而卒按占羽蟲之孽也

魏明帝景初元年陵霄閣始構有鵲巢其上鵲體白黑雜色此羽
蟲之孽又白黑祥也帝以問高堂隆對曰詩云惟鵲有巢惟鳩居
之今興起宮室而鵲來巢此宮室未成身不得居之象天意若
曰室未成將有它姓制御之不可不深慮於是帝改容動色
吳孫權赤烏十二年四月有兩鳥銜鵲墮東館權使領丞相朱據

燎鵲以祭案劉歆說此羽蟲之孽又黑祥也視不明聽不聰之罰也是時權意溢德衰信讒好殺二子將危將相俱殆覩妖不悟加之以燎昧道之甚者也明年太子和廢魯王霸賜死未據左遷陸議憂卒是其應也東館典教之府鵲墮東館又天意乎

吳孫權太元二年正月封前太子和爲南陽王遣之長沙有鵲巢其帆檣和故宮僚聞之皆憂慘以爲檣末傾危非久安之象是後果不得其死

吳孫亮建興二年十一月大鳥五見于春申吳人以其爲鳳凰明年改元爲五鳳漢桓帝時有五色大鳥司馬彪云政治衰缺無以致鳳乃羽蟲孽耳孫亮未有德政孫峻驕暴方甚此與桓帝同事也案瑞應圖大鳥似鳳而爲孽者非一疑皆是也

吳孫皓建衡三年西苑言鳳凰集以之改元義同於亮

晉武帝泰始四年八月翟雉飛上閭闔門趙倫既篡洛陽得異鳥莫能名倫使人持出周旋城邑匝以問人積日宮西有小兒見之遂自言曰服留鳥翳持者卽還白倫倫使更求小兒至又見之將入宮密籠鳥閉兒戶中明日視悉不見此羽蟲之孽又妖之甚者也

趙倫篡位有鶉入太極殿雉集東堂按太極東堂皆朝享聽政之所而鶉雉同日集之者天意若曰不當居此位也詩云鵲之疆疆鶉之奔奔人之無良我以為君其此之謂乎昔殷宗感雉懼而修德倫覩二物曾不知戒故至滅亡也

晉孝懷帝永嘉元年二月洛陽東北步廣里地陷有鵝出蒼色者飛翔冲天白者止焉此羽蟲之孽又黑白祥也董養曰步廣周之狄泉盟會地也白者金色蒼爲胡象其可盡言乎是後劉淵石勒

相繼擅華懷愍二帝淪滅非所

晉孝懷帝世周玘家有鵝在籠中而頭斷籠外玘亡後家誅

晉明帝太寧三年八月庚戌有鳥二蒼黑色翼廣一丈四尺其一集司徒府射而殺之其一集市北家人舍亦獲焉此羽蟲之孽又黑祥也閏月戊子帝崩後有蘇峻祖約之亂

晉成帝咸和二年正月有五鷗鳥集殿庭此又白祥也是時庾亮苟違衆謀將召蘇峻有言不從之咎故白祥先見也三年二月峻果作亂宮室焚毀化爲汙萊其應也

晉成帝咸康八年七月白鷺集殿屋是時康帝始卽位此不永之祥也後涉再朞而帝崩劉向曰野鳥入處宮室將空張瓘在涼州正朝放雀諸鳥出手便死左右放者悉飛去

晉孝武帝太元十六年正月鵲巢太極東頭鳴尾又巢國子學堂

西頭十八年東宮始成十九年正月鵲又巢其西門此殆與魏景初同占學堂風教所聚西門金行之祥也

晉安帝義熙三年龍驤將軍朱猗戎壽陽婢炊飯忽有羣鳥集竈競來啄噉婢驅逐不去有獵狗咋殺鳥鵲餘者因共啄狗卽死又噉肉唯餘骨存五年六月猗死

宋武帝永初三年臨軒拜徐羨之爲司徒百僚陪位有一野鶴集太極鳴尾嗚呼

少帝景平二年春鶴巢太廟西鳴尾驅去復還文帝元嘉二年春有江鷗鳥數百集太極殿前小階內明年誅徐羨之等

羊禍

晉成帝咸和二年五月司徒王導廐羊生無後足此羊禍也京房易傳曰足少者下不勝任也明年蘇峻入京都導與成帝俱幽石

頭僅乃免身是其應也

宋孝武帝大明七年永平郡獻三角羊羊禍也

赤青赤祥

公孫淵時襄平北市生肉長圍各數尺有頭目口喙無手足而動搖此赤青也占曰有形不成有體無聲其國滅亡淵尋爲魏所誅吳成將鄧嘉殺豬祠神治畢縣之忽見一人頭往食肉嘉引弓射中之咋咋作聲繞屋三日近赤祥也後人白嘉謀北叛闔門被誅京房易妖曰山見葆江于邑邑有兵狀如人頭赤色

吳諸葛恪將見誅盥洗水血臭侍者授衣衣亦臭此近赤祥也

晉武帝太康七年十一月河陰有赤雪二頃此赤祥也後涉四載而帝崩王宮遂亂

晉惠帝元康五年三月呂縣有流血東西百餘步此赤祥也元康

末窮凶極亂僵尸流血之應也干寶以爲後八載而封雲亂徐州殺傷數萬人是其應也

晉惠帝永康元年三月尉氏雨血夫政刑舒緩則有常燠赤祥之妖此歲正月送愍懷太子幽于許宮天戒若曰不宜緩恣姦人將使太子寃死惠帝愚昧不悟是月愍懷遂斃於是王室釁成禍流天下淖齒殺齊閔王日天雨血沾衣天以告也此之謂乎京房易傳曰歸獄不解茲謂追非厥咎天雨血茲謂不親民有怨心不出三年無其宗人又曰佞人祿功臣戮天雨血

晉愍帝建興四年十二月丙寅丞相府斬督運令史淳十伯血逆流上柱二丈三尺此赤祥也是時後將軍褚裒鎮廣陵丞相揚聲北伐伯以督運稽留及役使臧罪依征軍法戮之其息訴稱伯督運事訖無所稽之受賂役使罪不及死兵家之勢先聲後實實是

屯戍非爲征軍自四年以來運漕稽停皆不以軍興法論僚佐莫之理及有此變司直彈劾衆官元帝又無所問於是頻旱三年于寶以爲寃氣之應也郭景純曰血者水類同屬於坎坎爲法家水平潤下不宜逆流此政有咎失之徵也

宋書卷三十二

志第二十二終

藝文志卷之三十二

宋書卷三十三

志第二十三

藝文志卷之三十三

五行四

五行傳曰簡宗廟不禱祠廢祭祀逆天時則水不潤下謂水夫其性而爲災也又曰聽之不聰是謂不謀厥罰恒寒厥極貧時則有鼓妖時則有豕禍時則有魚孽時則有耳疴時則有黑雋黑祥惟火沴水魚孽劉歆傳以爲介蟲之孽謂蝗屬也

水不潤下

魏文帝黃初四年六月大雨霖伊洛溢至津陽城門漂數千家流殺人初帝卽位自鄴遷洛營造宮室而不起宗廟太祖神主猶在鄴嘗於建始殿饗祭如家人之禮終黃初不復還鄴而員丘方澤南北郊社稷等神位未有定所此簡宗廟廢祭祀之罰也京房易

傳曰顓事者加誅罰絕理厥災水其水也雨殺人巳隕霜大風天黃饑而不損茲謂泰厥大水水殺人避暹有德茲謂狂厥水水流殺人也巳水則地生蟲歸獄不解茲謂追非厥水寒殺人追誅不解茲謂不理厥水五穀不收大敗不解茲謂皆陰厥水流入國邑隕霜殺穀

吳孫權赤烏八年夏茶陵縣鴻水溢出流漂二百餘家十二年秋丹楊故鄣等縣又鴻水溢案權稱帝三十年竟不於建業創七廟但有父堅一廟遠在長沙而郊裡禮闕嘉禾初羣臣奏宜郊祀又弗許末年雖一南郊而北郊遂無聞焉且三江五湖衡霍會稽皆吳楚之望亦不見秩及禮羅陽妖神以求福助天意若曰權簡宗廟不禱祠廢祭祀示此罰欲其感悟也

太元元年又有大風涌水之異是冬權南郊疑是鑿咎徵乎還而

寢疾明年四月薨一曰權時信納譖訴雖陸議勲重子和儲貳猶不得其終與漢安帝聽讒免揚震廢太子同事也且赤烏中無年不用兵百姓愁怨八年秋將軍馬茂等又圖逆云

魏明帝景初元年九月淫雨過常冀兗徐豫四州水出沒溺殺人漂失財產帝自初卽位便淫奢極欲多占幼女或奪士妻崇飾宮室妨害農戰觸情恣欲至是彌甚號令逆時饑不損役此水不潤下之應也

吳孫亮五鳳元年夏大水亮卽位四年乃立權廟又終吳世不上祖宗之號不修嚴父之禮昭穆之數有關亮及休皓又並廢二郊不秩羣神此簡宗廟不祭祀之罰也又是時孫峻專政陰勝陽之應乎

吳孫休永安四年五月大雨水泉涌溢昔歲作浦里塘功費無數

而田不可成士卒死叛或自賊殺百姓愁怨陰氣盛也休又專任張布邊盛冲等吳人賊之之應也

吳孫休永安五年八月壬午大雨震雹水泉涌溢

晉武帝太始四年九月青徐兗豫四州大水七年六月大雨霖河洛伊沁皆溢殺二百餘人帝即尊位不加三后祖宗之號太始二年又除明堂南郊五帝坐同稱昊天上帝一位而已又省先后配地之禮此簡宗廟廢祭祀之罰與漢成帝同事一曰昔歲及此年藥蘭泥白虎文秦涼殺刺史胡烈幸弘遣田璋討泥又司馬望以大衆次淮北禦孫皓内外兵役西州饑亂百姓愁怨陰氣盛也咸寧初始上祖宗號太熙初還復五帝位

晉武帝咸寧元年九月徐州水二年七月癸亥河南魏郡暴水殺百餘人八月荊州郡國五大水去年采擇良家子女露面入殿帝

親簡閱務在姿色不訪德行有蔽匿者以不敬論搢紳愁怨天下非之陰盛之應也

咸寧三年六月益梁二州郡國八暴水殺三百餘人七月荊州大水九月始平郡大水十月青徐兗豫荆益梁七州又水是時賈充等用事日盛而正人疏外者多

咸寧四年七月司冀兗豫荆揚郡國二十大水

晉武帝太康二年六月泰山江夏大水泰山流三百家殺六千餘人江夏亦殺人是時平吳後王濬爲元功而詆劾妄加荀賈爲無謀而並蒙重賞收吳姬五千納之後官此其應也

太康四年七月司豫徐兗荆揚郡國二十大水傷秋稼壞屋室有死者

太康六年三月青涼幽冀郡國十五大水

太康七年九月西方安定等郡國八大水

太康八年六月郡國八大水

晉惠帝元康二年有水災

元康五年五月潁川淮南大水六月城陽東莞大水殺人荆揚徐
兗豫五州又大水是時帝即位已五載猶未郊祀烝嘗亦多不身
親近簡宗廟廢祭祀之罰也班固曰王者即位必郊祀天地望秩
山川若乃不敬鬼神政令違逆則霧水暴至百川逆溢壞鄉邑溺
人民水不潤下也

元康六年五月荆揚二州大水按董仲舒說水者陰氣盛也是時
賈后亂朝寵樹賈郭女主專政之應也

元康八年五月金墉城井水溢漢成帝時有此妖班固以為王莽
之象及趙倫篡位即此應也倫廢帝於此城井溢所在又天意乎

元康八年九月荆揚徐兗冀五州大水是時賈后暴戾滋甚韓謚
驕猜彌扇卒害太子旋亦禍滅

元康九年四月宮中井水沸溢

晉惠帝永寧元年七月南陽東海大水是時齊王冏秉政專恣陰
盛之應

晉惠帝大安元年七月兗豫徐冀四州水時將相力政無尊主心
晉孝懷帝永嘉四年四月江東大水是時王導等潛懷翼戴之計
陰氣盛也

晉元帝大興三年六月大水是時王敦內懷不臣傲狠作威後終
夷滅

大興四年七月大水明年有石頭之敗

晉元帝永昌二年五月荊州及丹陽宣城吳興壽春大水

晉明帝太寧元年五月丹陽宣城吳興壽陽大水是時王敦疾害忠良威權震主尋亦誅滅

晉成帝咸和元年五月大水是時嗣主幼冲母后稱制庾亮以元舅民望決事禁中陰勝陽也

咸和二年五月戊子京都大水是冬蘇峻稱兵都邑塗炭

咸和四年七月丹陽宣城吳興會稽大水是冬郭默作亂荆豫共討之半歲乃定

咸和五年五月大水是時帝未親務政在大臣陰勝陽也

晉成帝咸康元年八月長沙武陵大水是年三月石虎掠騎至歷陽四月圍襄陽於是加王導大司馬集徒旅又使趙鳳路永劉光之陳光五將軍各帥衆戍衛百姓愁怨陰氣盛也

晉穆帝永和四年五月大水是時幼主冲弱母后臨朝又將相大

臣各爭權政與咸和初同事也

永和五年五月大水

永和六年五月大水

永和七年七月甲辰夜濤水入石頭死者數百人去年殷浩以私忿廢蔡謩遐邇非之又幼主在上而殷桓交惡選徒聚甲各崇私權陰勝陽之應也一說濤入石頭江右以爲兵占是後殷浩桓溫謝尚荀羨連年征伐

晉穆帝升平二年五月大水是時桓溫權制朝廷征伐是專升平五年四月大水

晉海西太和六年六月東都大水平地數尺侵及太廟朱雀大航纜斷三艘流入大江丹楊晉陵吳國吳興臨海五郡又大水稻稼蕩沒黎庶饑饉初四年桓溫北伐敗績十喪其九五年又征淮南

踰歲乃克百姓愁怨之應也

晉簡文帝咸安元年十二月壬午濤水入石頭明年妖賊盧竦率其屬數百人入殿略取武庫三庫甲仗游擊將軍毛安之討滅之

晉孝武帝太元三年六月大水是時孝武幼弱政在將相

太元五年大水去年氏賊攻沒襄陽又向廣陵於是逼徙江淮民悉令南渡三州失業道殣相望謝玄雖破句難等自後征戍不已百姓愁怨之應也

太元六年六月荆江揚三州大水

太元十年夏大水初八年破苻堅自後有事中州役無已歲兵民愁怨之應也

太元十三年十二月濤水入石頭明年丁零鮮卑寇擾司兗鎮戍西北疲於奔命

太元十五年七月兗州大水是時緣河紛爭征戍勤悴

太元十七年六月甲寅濤水入石頭毀大航漂船舫有死者京口西浦亦濤入殺人永嘉郡潮水涌起近海四縣人民多死後四年帝崩而王恭再攻京師京師亦發大眾以禦之

太元十九年七月荊州彭城大水傷稼

太元二十一年五月癸卯大水是時政事多弊兆庶非之

太元二十年荊州彭城大水

晉安帝隆安三年五月荊州大水去年殷仲堪舉兵向京都是年春又殺郗恢陰盛作威之應也仲堪尋亦敗亡

隆安五年五月大水是時司馬元顯作威陵上又桓玄擅西夏孫恩亂東國陰勝陽之應也

晉安帝元興二年十二月桓玄篡位其明年二月庚寅夜濤水入

石頭是時賈使商旅方舟萬計漂敗流斷骸骨相望江右雖有濤
變未有若斯之甚三月義軍克京都立敗走遂夷滅

元興三年二月己丑朔夜濤水入石頭漂沒殺人大航流敗

晉安帝義熙元年十二月己未濤水入石頭

義熙二年十二月己未夜濤水入石頭明年駱球父環潛結桓胤
殷仲文等謀作亂劉稚亦謀反凡所誅滅數十家

義熙三年五月丙午大水

義熙四年十二月戊寅濤水入石頭明年王旅北討鮮卑

義熙六年五月丁巳大水乙丑盧循至蔡洲

義熙八年六月大水

義熙九年五月辛巳大水

義熙十年五月丁丑大水戊寅西明門地穿涌水出毀門扉及限

七月乙丑淮北災風大水殺人

義熙十一年七月丙戌大水淹漬太廟百官赴救明年王旅北討
關河

宋文帝元嘉五年六月京邑大水七年右將軍到彥之率師入河

元嘉十一年五月京邑大水十三年司空檀道濟誅

元嘉十二年六月丹陽淮南吳興義興五郡大水京邑乘船

元嘉十八年五月江水汎溢沒居民害苗稼明年右軍將軍裴方

明率雍梁之衆伐仇池

元嘉十九年二十年東都諸郡大水

元嘉二十九年五月京邑大水

孝武帝孝建元年八月會稽大水平地八尺後二年虜寇青冀州
遣羽林軍卒討伐

孝武帝大明元年五月吳興義興大水

大明四年八月離州大水

大明四年南徐南兗州大水

後廢帝元徽元年六月壽陽大水

順帝昇明元年七月離州大水甚於關羽樊城時

昇明二年二月於潛翼異山一夕五十二處水出流漂居民七月

丙午朔濤水入石頭居民皆漂沒

恒寒

庶徵之恒寒劉歆以爲大雨雪及未當雨雪而雨雪及大雨雹隕霜殺菽草皆常寒之罰也京房易傳曰有德遭險茲謂逆命厥異寒誅罰過深當燠而寒盡六日亦爲雹害正不誅茲謂養賊寒七十二日殺飛禽道人始去茲謂傷其寒物無霜而死涌水出戰不

量敵茲謂辱命其寒雖雨物不茂

吳孫權嘉禾三年九月朔隕霜傷穀按劉向說誅罰不由君出在臣下之象也是時校事呂壹專作威福與漢元帝時石顯用事隕霜同應班固書九月二日陳壽言朔皆明未可以傷穀也壹後亦伏誅京房易傳曰興兵妄誅茲謂亡法厥災霜夏殺五穀冬殺麥誅不原情茲謂不仁其霜夏先大雷風冬先雨乃隕霜有芒角賢聖遭害其霜附木不下地佞人依刑茲謂私賊其霜在草根土隙閒不教而誅茲謂虐其霜反在草下

嘉禾四年七月雨雹又隕霜案劉向說雹者陰脇陽是時呂壹作威用事詆毀重臣排陷無辜自太子登以下咸患毒之而壹反獲封侯寵異與春秋公子遂專任雨雹同應也漢安帝信讒多殺無辜亦雨雹董仲舒曰凡雹皆爲有所脇行專壹之政故也

吳孫權赤烏四年正月大雪平地深三尺鳥獸死者大半是年夏全琮等四將軍攻略淮南襄陽戰死者千餘人其後權以讒邪數責讓陸議憤恚致卒與漢景武大雪同事也

赤烏十一年四月雨雹是時權聽讒將危太子其後朱據屈晃以逆意黜辱陳象以忠諫族誅而太子終廢此有德遭險誅罰過深之應也

晉武帝太始六年冬大雪

太始七年十二月大雪明年有步闡楊肇之敗死傷甚衆

太始九年四月辛未隕霜是時賈充親黨比周用事與魯定公漢元帝時隕霜同應也

晉武帝咸寧二年八月平原安平上黨秦郡霜害三豆

咸寧三年八月河間暴風寒冰郡國五隕霜傷穀是後大舉征吳

馬隆又帥精勇討涼州

咸寧五年五月丁亥鉅鹿魏郡雨雹傷禾麥辛卯雁門雨雹傷秋稼

咸寧五年六月庚戌汲郡廣平陳留滎陽雨雹丙辰又雨雹損傷秋麥千三百餘頃壞屋百三十餘間癸亥安定雨雹七月丙申魏郡又雨雹閏月壬子新興又雨雹八月庚子河東弘農又雨雹兼傷秋稼三豆

晉武帝太康元年三月河東高平霜雹傷桑麥四月河南河內河東魏郡弘農雨雹傷麥豆五月東平平陽上黨鴈門濟南雨雹傷禾麥三豆

太康元年四月庚午畿內縣二及東平范陽縣雨雹癸酉畿內縣五又雨雹是時王濟有大功而權戚互加陷抑帝從容不斷陰脇

陽之應也

大康二年二月辛酉殞霜于濟南琅邪傷麥壬申琅邪雨雪傷麥
三月甲午河東隕霜害桑

太康二年五月丙戌城陽章武琅邪夷寅河東樂安東平濟陰弘
農濮陽齊國頓丘魏郡河內汲郡上黨雨雹傷禾稼

太康二年六月郡國十六雨雹

太康三年十二月大雪

太康五年七月乙卯中山東平雨雹傷秋稼

太康五年七月甲辰中山雨雹九月南安大雪折木

太康六年二月東海霜傷桑麥

太康六年三月戊辰齊郡臨菑長廣不其等四縣樂安梁鄒等八
縣琅邪臨沂等八縣河間易城等六縣高陽北新城等四縣隕霜

傷桑麥

太康六年六月滎陽汲郡鴈門雨雹

太康八年四月齊國天水二郡隕霜十二月大雪

太康九年正月京都大風雨雹發屋拔木四月隴西隕霜

太康十年四月郡國八隕霜

晉惠帝元康二年八月沛及湯陰雨雹

元康三年四月滎陽雨雹弘農湖華陰又雨雹深三尺是時賈后
凶淫專恣與春秋曾桓夫人同事陰氣盛也

元康五年六月東海雨雹深五寸十二月丹楊雨雹

元康五年十二月丹陽建業大雪

元康六年三月東海隕霜殺桑麥

元康七年五月魯國雨雹七月秦隄二州隕霜殺稼

元康九年三月旬有八日河南滎陽潁川隕霜傷禾五月雨雹是時賈后凶躁滋甚是冬遂廢愍懷

晉惠帝永寧元年七月襄城雨雹是時齊王冏專政十月襄城河南高平平陽風雹折木傷稼

晉惠帝光熙元年閏八月甲申朔霰雪劉向曰盛陽雨水湯熱陰氣勝之則轉而爲雹盛陰雨雪凝滯陽氣薄之則散而爲霰今雪非其時此聽不聰之應也

晉孝懷帝永嘉元年十二月冬雪平地三尺

永嘉七年十月庚午大雪

晉愍帝建興元年十一月戊午會稽大雨震雹已巳夜赤氣曜於西北是夕大雨震雹庚午大雪案劉向說雷以二月出八月入此月雷電者陽不閉藏也既發泄而明日便大雪皆失節之異也是

時劉載僭號平陽李雄稱制於蜀九州幅裂西京孤微爲君失時之象

晉元帝太興二年三月丁未成都風雹殺人

太興三年三月海鹽郡雨雹是時王敦陵上

晉元帝永昌二年十二月幽冀并三州大雪

晉明帝太寧元年十二月幽冀并州大雪

太寧二年四月庚子京都大雨雹燕雀死

太寧三年三月丁丑雨雹癸巳隕霜四月大雨雹是年帝崩尋有

蘇峻之亂

晉成帝咸和六年三月癸未雨雹是時帝幼弱政在大臣

咸和九年八月成都雪其日李雄死

晉成帝咸康二年正月丁巳皇后見于太廟其夕雨雹

晉康帝建元元年八月大雪是時政在將相陰氣盛也與春秋魯昭公時季孫宿專政同事劉向曰凡雨陰也雪又雨之陰也出非其時迫近象也

晉穆帝永和三年八月冀方大雪人馬多凍死

永和五年六月臨漳暴震霆雨雹大如升

永和十年五月涼州雪明年八月枹罕護軍張瓘帥宗混等攻滅張祚更立張曜弟玄靚京房易傳曰夏雪戒臣爲亂

永和十一年四月壬申朔雪十二月戊午雷己未雷是時帝幼母后稱制政在大臣

晉穆帝升平二年正月大雪

晉孝武帝太元二年四月己酉雨雹十二月大雪時帝幼弱政在將相

太元十二年四月己丑雨雹是時有事中州兵役連歲

太元二十年五月癸卯上虞雨雹

太元二十一年四月丁亥雨雹是時張夫人專幸及帝暴崩兆庶尤之

太元二十一年十二月連雪二十三日是時嗣主幼冲冢宰專政晉安帝隆安二年三月己卯雨雹是秋王恭殷仲堪入伐終皆誅晉安帝元興二年十二月酷寒過甚是時桓玄篡位政事煩苛是其應也晉氏失在舒緩玄則反之劉向曰周衰無寒歲秦滅無燠年此之謂也

元興三年正月甲申霰雪又雷雷霰不應同日失節之應也二月義兵起玄敗

元興三年四月丙午江陵雨雹是時安帝蒙塵

晉安帝義熙元年四月壬申雨雹是時四方未一鉦鼓日戒
義熙五年三月己亥雪深數寸

義熙五年五月癸巳溧陽雨雹九月己丑廣陵雨雹明年盧循至
蔡州

義熙五年九月己丑廣陵雨雹

義熙六年正月丙寅又雪

義熙六年五月壬申雨雪

義熙八年四月辛未朔雨雹六月癸亥雨雹大風發屋是秋誅劉
蕃等

義熙十年四月辛卯雨雹

宋文帝元嘉九年春京都雨雹溧陽盱眙尤甚傷牛馬殺禽獸
元嘉十八年三月雨雹二十五虜寇青州

元嘉二十五年正月積雪冰寒

元嘉二十九年五月盱眙雨雹大如雞卵三十年國家禍亂兵革
大起

孝武帝大明元年十二月庚寅大雪平地二尺餘明年虜侵冀州
遣羽林軍北討

明帝泰始五年四月壬辰京邑雨雹

後廢帝元徽三年五月乙卯京邑雨雹
雷震

魏明帝景初中洛陽城東橋洛水浮橋桓楹同日三處俱震尋又
震西城上候風木飛鳥時勞役大起帝尋晏駕

吳孫權赤烏三年夏震宮門柱又擊南津大橋桓楹

孫亮建興元年十二月朔大風震雹是月又雷雨義同前說亮終

廢

晉武帝太康六年十二月甲申朔淮南郡震電

太康七年十二月己亥毗陵雷電南沙司鹽都尉戴亮以聞

太康十年十二月癸卯盧江建安雷電大雨

晉惠帝永康元年六月癸卯震崇陽陵標西南五百步標破為七十片是時賈后陷害冉輔寵樹私戚與漢桓帝時震憲陵寢同事也后終誅滅

晉惠帝永興二年十月丁丑雷電

晉懷帝永嘉四年十月震電

晉元帝永昌二年七月丙子朔雷震太極殿柱

永昌二年十一月會稽吳郡雨震電

晉明帝太寧元年七月丙子朔震太極殿柱

晉成帝咸和元年十月己巳會稽郡大雨震電

咸和三年六月辛卯臨海大雷破郡府內小屋柱十枚殺人

咸和三年九月二日立冬會稽震電

咸和四年十二月吳郡會稽震電

咸和四年十二月丹陽震電

晉穆帝永和七年七月壬午雷雨震電

晉穆帝升平元年十一月庚戌雷乙丑又雷

升平五年十月庚午雷發東南

晉孝武帝太元五年六月甲寅雷震含章殿四柱

太元五年十二月雷聲在南方

太元十四年七月甲寅震宣陽門西柱

晉安帝隆安二年九月壬辰雨雷

晉安帝元興三年永安皇后至自巴陵將設儀導入宮天雷震人馬各一俱殪

晉安帝義熙四年十一月辛卯朔西北疾風癸丑雷

義熙五年六月丙寅震太廟破東鴟尾徹壁柱

義熙六年正月丙寅雷又雷

義熙六年十二月壬辰大雷

義熙九年十一月甲戌雷乙丑又雷

宋文帝元嘉四年十一月癸丑雷

元嘉五年六月丙寅震太廟破東鴟尾徹壁柱

元嘉六年正月丙寅雷且雪

元嘉七年十月丙子雷

元嘉八年十二月庚辰雷

元嘉九年十一月甲戌雷且雪

元嘉十四年震初寧陵口標四破至地十七年廢大將軍彭城王義康骨肉相害自此始也

前廢帝景和元年九月甲午雷震

明帝泰始二年九月辛巳雷震

泰始四年十月辛卯雷震

泰始四年十一月癸卯朔雷震

泰始五年十一月乙巳雷震

泰始六年十一月庚午雷

後廢帝元徽三年九月戊戌雷

元徽三年九月丁未雷

元徽三年九月戊午雷震

元徽三年十月辛未雷甲戌又雷

順帝昇明三年二月二十四日丙申震建陽門

鼓妖

晉惠帝元康九年三月有聲若牛出許昌城十二月廢太子幽于許宮按春秋晉文公柩有聲如牛劉向以爲鼓妖其說曰聲如此怒象也將有急怒之謀以生兵甲之禍此其類也明年賈后遣黃門孫慮殺太子擊以藥杵聲聞于外

蘇峻在歷陽外營將軍鼓自鳴如人弄鼓者峻手自斫之曰我鄉土時有此則城空矣俄而作亂夷滅此聽不聰之罰鼓妖先作也石虎末洛陽城西北九里石牛在青石跌上忽鳴喚聲聞四十里虎遣人打落兩耳及尾鐵釘釘四脚

晉孝武太元十五年三月巳酉朔東北有聲如雷案劉向說以爲

雷當託於雲猶君託於臣無雲而雷此君不恤下下民將叛之象也及帝崩而天下漸亂孫恩桓玄交陵京邑

吳興長城縣夏架山有石鼓長丈餘面徑三尺所下有盤石爲足鳴則聲如金鼓三吳有兵晉安帝隆安中大鳴後有孫靈秀之亂魚孽

魏齊王嘉平四年五月有二魚集于武庫屋上此魚孽也王肅曰魚生于淵而亢於屋介鱗之物失其所也邊將其殆有棄甲之變乎後果有東關之敗于寶又以爲高貴公兵禍之應二說皆與班固旨同

晉武帝太康中有鯉魚二見武庫屋上于寶曰武庫兵府魚有鱗甲亦兵類也魚旣極陰屋上太陽魚見屋上象至陰以兵革之禍于大陽也至惠帝初誅楊駿廢太后矢交館閣元康末賈后謗殺

太子尋亦誅廢十年間母后之難再興是其應也自是禍亂構矣
京房易妖曰魚去水飛入道路兵且作

蝗蟲

魏文帝黃初三年七月冀州大蝗民饑案蔡邕說蝗者在上貪苛
之所致也是時孫權歸從帝因其有西陵之役舉大眾襲之權遂
背叛

晉武帝太始十年六月蝗是時荀賈任政疾害公直

晉孝懷帝永嘉四年五月大蝗自幽并司冀至于秦雍州木牛馬
毛鬣皆盡是時天下兵亂漁獵生民存亡所繫唯司馬越苟晞而
已而競為暴刻經略無章

晉愍帝建興四年六月大蝗去歲胡寇頻攻北地馮翊麴允等悉
眾禦之是時又禦劉曜為曜所破西京遂潰

晉元帝太興元年六月蘭陵合鄉蝗害禾稼乙未東莞蝗蟲縱廣
三百里害苗稼

太興元年七月東海彭城下邳臨淮四郡蝗蟲害禾豆

太興元年八月冀青徐三州蝗食生艸盡至于二年是時中州淪
喪暴亂滋甚

太興二年五月淮陵臨淮淮南安豐廬江諸郡蝗食秋麥

太興三年五月癸丑徐州及揚州江西諸郡蝗吳民多餓死去年
王敦并領荊州苛暴之釁自此興矣又是年初徐州刺史蔡豹帥
眾伐周撫

晉孝武帝太元十五年八月兗州蝗是時丁零寇兗豫鮮卑逼河
南征戍不已

太元十六年五月飛蝗從南來集堂邑縣界害苗稼是年春發取

江州兵營甲士二千人家口六千人配護軍及東宮後尋散亡殆盡又邊將連有征役

豕禍

吳孫皓寶鼎元年野豕入右司馬丁奉營此豕禍也後奉見遣攻穀陽無功及皓怒斬其導軍及舉大眾北出奉及萬或等相謂曰若至華里不得不各自還也此謀泄奉時雖已死皓追討穀陽事殺其子溫家屬皆遠徙豕禍之應也龔遂曰山野之獸來入宮室宮室將空又其象也

晉孝懷帝永嘉中壽春城內有豕生兩頭而不活周馥取而觀之時通數者竊謂曰夫豕北方之畜胡狄象也兩頭者無上也生而死不遂也天意若曰勿生專利之謀將自致傾覆也周馥不悟遂欲迎天子令諸侯俄爲元帝所敗是其應也石勒亦尋渡淮百姓

死者十八九

晉武帝建武元年有豕生八足聽不聰之罰也京房易傳曰凡妖作各象其類足多者所任邪也是後有劉隗之變

晉成帝咸和六年六月錢塘民家殺豕生兩子皆人面如胡人狀其身猶豕京房易妖曰豕生八頭豕身者邑且亂亡此殺豕而產異之甚者

晉孝武帝太元十年四月京都有豕一頭二身八足十三年京都民家豕產子一頭二身八足並與建武同妖也是後宰相沈酗不恤朝政近習用事漸亂國綱至於大壞也

黑青黑祥

晉孝懷帝永嘉五年十二月黑氣四塞近黑祥也

宋文帝元嘉二十六年三月幸京口有黑氣暴起占有兵明年虜

南寇至瓜步飲馬于江

火沴水

晉武帝太康五年六月任城魯國池水皆赤如血案劉向說近火沴水也聽之不聽之罰也京房易傳曰淫於色賢人潛國家危厥異水流赤

晉穆帝升平三年二月涼州城東池中有火四年四月姑臧澤水中又有火此火沴水之妖也明年張天錫殺中護軍張邕邕執政臣也

晉安帝元興二年十月錢塘臨平湖水赤桓玄諷吳郡使言開除以為已瑞俄而玄敗

